

修訂日期: 2009/04/22 發行日期: 2009/5/9

發行單位: 中華電子佛典協會 (CBETA) <http://www.cbeta.org>

資料底本: 卍新纂續藏經 Vol. 70, No. 1394

原始資料: CBETA 人工輸入, CBETA 掃瞄辨識

No. 1394-A

余一日偶料揀亂書。得語錄數板。蠹蝕。僅存。或三五行或十百字。老辣痛快。險怪奇絕。實語誑語。句句皆破的。為之悚然。而首尾壞爛。不知為何如人也。求之槩山。得其完本。乃五祖演所作。圓悟虎丘。却向這裏。搬販出來。方信波斯別瑤。世有底事。忽緇衣及門。持此卷求序。讀數過。電光石火。閃閃爍爍。醍醐毒藥。色色俱有。儼然如見前人風度。方知斷橋之名。信不虛得。合爪贊嘆。為之證明。雖然識真人少。接響人多。試將此集。莫出姓名。使諸方具眼者猜看。師名妙倫。天台人。咸淳初元人日。虞齋林希逸敘。

斷橋和尚語錄目次

林希逸序

卷上台州瑞峯祇園禪寺錄

台州瑞巖淨土禪寺錄

天台國清教忠禪寺錄

淨報慈恩光孝禪寺錄

卷下法語

佛祖讚

自讚

偈頌

小佛事

行狀

No. 1394

斷橋和尚語錄卷上

斷橋和尚初住台州瑞峯祇園禪寺語錄

侍者 文寶 善靖 編

師於淳祐元年。三月十一日。入院。

指三門云。大道無門。諸人擬向甚麼處入。遂舉足云。看脚下。

佛殿。二千年前。我不如你。二千年後。你不如我。舉香云。看看。冷處與你著把火。

踞室。橫一丈豎十尺。明眼衲僧。近傍不得。若有人。向這裏。轉得身。吐得氣。祇園水也未到你喫。

拈帖。穿人鼻孔。換人眼睛。都來只是這一句子。如何見得。題目分明。

拈法衣。這一片牛皮。天下老和尚。總被它包裹了也。新祇園。今日回避稍遲。亦遭其害。只得懽喜受之。頂戴披之。豈憚拖泥帶水時。

指法座。盡大地。是箇寶華王座。只為諸人不能履踐。而使祇園。向這裏。起模畫[打-丁+篆]。說東道西。無階梯處立階梯。

陞座。拈香祝

聖畢。次拈香云。此香。昔年行脚到雲居。向故紙堆中拾得。無端逗到千丈巖頭。撞著箇煨不熟煮不爛底。被它一嗅。氣息全無。爇向爐中。供養見住徑山興聖萬壽禪寺。佛鑑禪師無準大和尚。用酬法乳之恩。遂跌座(問答不錄) 乃云。釋迦已滅。彌勒未生。今日正當新祇園主丈子。應世說法。不在長說短說。曲說直說。只據自家赤骨力地。拈出一句子。使天上人間。未聞者聞。未見者見。乃拈主丈云。直得開山祿禪師出來。撫掌呵呵大笑。却道。自我一去三百年。未嘗聞有者箇消息。然雖與麼。爭奈主丈子。未點頭在。何故。萬年松在祝融峯。

復舉。保壽開堂。三聖推出一僧。壽便打。聖云。恁麼為人。非但瞎却者僧眼。瞎却鎮州一城人眼去在。壽便歸方丈。

師拈云。二大老。一箇麈頭鼠目。一箇蠶尾狼心。却教者僧。將赤肉抵白棒。也太無端。然雖如是。不因漁父引。爭得見波濤。

當晚小參。德山小參不答話。太平姦賊。趙州小參却答話。亂世英雄。二老漢。各有彌天之過。新祇園入院事繁。未暇勘證。今夜且與祖翁出隻手。整頓破沙盆。教一切人。同得受用。以拂打圓相云。會麼。南斗西轉。北斗東移。

復舉。僧問投子。如何是十身調御。投子下禪床而立。

師頌云。曉花初拆露香新。獨向空山冷襯雲。忽被春風輕觸著。淡紅脫落亂紛紛。

謝知事上堂。花間蝶舞。柳上鶯啼。瞿曇未曉。達磨猶迷。分付叢林能事漢。臨機一一好提撕。忽然提撕不得。計較不成。祇園老僧。却與說三分話。

上堂。舉阿難問迦葉。世尊付金襴外。別傳何物。迦葉召阿難。難應諾。迦葉云。倒却門前剎竿著。

師頌云。落賴家風彼此知。麤茶淡飯暫相依。弟兄畢竟難同活。不免分頭各自為。

浴佛上堂。四月八。生悉達。天上人間鬧聒聒。老韶陽要打殺。爭似祇園舀水薰頭潑。阿呵呵。雖是死蛇。會弄也活。

結夏小參。禪禪。斷貫索左穿右穿。道道。生苕帚橫掃豎掃。伶俐漢直下會得。便乃禁足於鑊湯爐炭。護生於劍樹刀山。天魔窺覷無門。佛祖讚嘆有分。若不然者。九十日內。二六時中。山邊水畔行但行。石上松根坐但坐。只是向後逢人。不要道在祇園過夏。何也。此去黃巖一日程。

復舉。梁王問達磨。如何是聖諦第一義。磨云。廓然無聖。王曰。對朕者誰。磨云不識。

師拈云。老胡自西天來。將箇木橛子。平白換人眼睛。若不是梁王。幾遭毒手。雖然。諸人也須照顧。良久云。著了也。

上堂。天自高。地自厚。一一不是單。三三亦非九。唯愛部瀆山前丘大翁。見人長揖高叉手。還有佛法底道理也無。咄。合取臭口。

中夏上堂。前半夏已去。新事不添。後半夏未來。舊事不減。而今新也舊也。拈向一邊。諸人且道。是甚麼事。良久云。夜短睡不足。日長飢有餘。

解夏小參。鋤畚一片。下種一籬。大仰狼藉不少。日中一餐。夜後一寢。大瀉敗闕尤多。祇園今夏。雖則清寥寥白的的。厨乏聚蠅之糝。囊無繫蟻之絲。要且不打這鼓笛。誰更管你有結有解。無解無結。七箇八箇。指馬作驢。三人四人。證龜成鳖。別別。打刀須是邠州鐵。卓主丈一下。

復舉。洞山示眾云。秋初夏末。兄弟東去西去。直須向萬里無寸草處去。只如萬里無寸草處。作麼生去。後有僧。舉似石霜。霜云。出門便是草。洞山云。大唐國裏。能有幾人。

師拈云。二尊宿。一人舌上有十字關。一人脚下有三色線。檢點得出。與你一繡草鞋。

解夏上堂。布袋打開。主丈拈起。去也由你。住也由你。若是通方一句子。祇園向你道。遂搖手云。未是未是。

中秋上堂。靈山話月。曹溪指月。檢點將來。只得半橛。祇園不惜眉毛。直下分明揭示去也。豎拂云。團團離海嶠。豎起拂云。漸漸出雲衢。打圓相云。此夜一輪滿。擲下云。清光何處無。喝一喝。便下座。

結夏上堂。祇園今日結夏。無可供養諸人。昨自縣裏歸來。有一轉語。舉似大眾。乃云。巖瞻坊外。草鞋一繡。定賣七錢。

上堂。一切心是佛心。乃喝云。這箇且不是佛心。一切法是佛法。豎主丈云。這箇且不是佛法。既不是佛心。不是佛法。畢竟是箇什麼。擲下主丈云。阿刺刺。阿刺刺。

解夏小參。四月十五日。頭頂天。腳踏地。七月十五日。腳踏地。頭頂天。窮其結也。了不可得。究其解也。了不可得。不可得也了不可得。諸人向這裏。著得半隻眼。黃面老漢。喚取提鞋。碧眼胡兒。叫來洗脚。自餘蚊蚋之解。螻蟻之能。且居門

外。若也今日三明日四。悠悠颺颺。瞞瞞預預。吽。還我九十日飯錢來。

復舉。香巖示眾云。如人上樹。口銜樹枝。脚不踏枝。手不攀枝。忽有人。問祖師西來意。若答他。即喪身失命。不答。又違他所問。時有虎頭上座。出云。樹上即不問。樹下道將一句來。巖遂呵呵大笑。

師拈云。香巖布箇網子。籠罩天下衲僧。虎頭上座。雖則網外與之相見。爭奈依然落在裏許。

上堂。一夏九十日。今朝事已周。寒山逢拾得。把手話來由。且道話箇什麼。梨出青州。棗出鄭州。

謝道舊上堂。舉慈明上堂云。颯颯涼風景。同人訪寂寥。煮茶山水下。燒鼎洞中樵。慈明老漢。雖則大開東閣。管顧高賓。檢點將來。未免私用常住。爭似祇園。上客到來。只據現定。且如何是現定底道理。良久云。面面相對。心心相知。人情若好。喫水也肥。

浴佛上堂。釋迦老子。初生下來。幸然清淨。無端被後代兒孫。競將惡水。驀頭潑了。道我報德酬恩。殊不知倒添他一身蕞苴。祇園既忝末裔。未免別展禮儀。拈折柄杓。留不濕水。沐無形軀。直使通上徹下。歡喜快活。非但我佛快活。乃至大地眾生。一齊快活。於是主丈子亦快活。乃擲下云。快活快活。

結夏小參。即心即佛。烏龜火裏鞞金毬。非佛非心。碧兔水中懸寶鏡。祇園今夏。且與麼。開試場。立題目。諸人能向九十日內。不舉手。示一機。不動舌。道一句。管取心空及第。作箇禪中狀元。若是思而知。慮而解。言前定旨。句下明宗。非惟辜負先賢。亦乃埋沒自己。與麼告報。眾中莫有丹霄獨步。出來。掀倒禪牀。喝散大眾底麼。不是龍門客。切忌遭點額。

復舉。野狐公案。師頌云。沙鷗盡日戲江濱。幾度浮來幾度沈。漁笛一聲驚起去。依前飛下碧波心。

上堂。躡踵幾隻牯牛。總在瑞峯過夏。有心臥月眠雲。無意牽犁拽[木*罷]。溪東溪西。嶺上嶺下。飲水自飲水。喫草自喫草。第一不得犯人苗稼。拍禪牀下座。

解夏小參。兼謝宜首座。澗水泠泠。巖雲片片。滿耳不聞。滿眼不見。祇園早年行脚。遊遍二十三州。四十七縣。零零碎碎。收拾一布袋。拈起嶮似懸崖。放下平如鏡面。馬簸箕冷地知得。走來騰身一覷。[口@力]。你者滯貨。雖不直錢。煞有靈驗。何不向自恁日打開。平等布施。直教貧賤者富貴。富貴者貧賤。山僧被伊點破。不覺手脚忙。心膽顫。卓主丈云。鐵壁銀山通一線。

復舉。僧問風穴和尚。九夏賞勞。請師言薦。風穴云。一把香芻拈未暇。六環金錫響搖空。

師拈云。剪水裁雲。雕冰鏤玉。則不無風穴。爭奈辜負來機。祇園當時見他與麼問。便與一棒。何故。見義不為。無勇也。

散聖節上堂。正月初五日。乃是我。

皇。慶誕之辰。祇園臣子。拈須彌槌。擊虛空鼓。集河沙諸佛。說無量法門。以祝萬年之壽。然雖如是。豎拂云。且道。這箇法門。是那箇佛說。擲拂於背後。便下座。

退院上堂。來住瑞峯。去住瑞巖。未操雪曲。且打鄉談。撫禪牀云。會麼。天上人間一十三。

斷橋和尚遷住台州瑞巖淨土禪寺語錄

侍者 編

入寺。指三門云。昔年出此門去。步步踏著。今日入此。門來。頭頭撞著。畢竟以何為驗。乃顧視寺額云。泊合道著。

佛殿。[口@力]。多時不相見也。乃揖云。瞿曇萬福。

踞室。內不放出。外不放入。眨得眼來。鐵壁鐵壁。

拈帖。擒虎兇。辨龍蛇。一句子。絕周遮。何故。太白不曾登便殿。筆頭昨夜自生花。

指法座。峭峻一方。玲瓏八面。須彌燈王。有眼者見。若不見。乃登座云。隨我脚跟轉。

拈香祝

聖罷。斂衣就座。示眾云。大智洞明。千變萬化。大機普應。七縱八橫。昨離瑞阜。棒頭列定竇中竇。今到鞞峯。喝下分開主中主。掃蕩野狐窠窟。放出獅子爪牙。惺惺石上。布嶮分危。滴滴泉邊。揚清激濁。直得猿啼古木。虎嘯幽巖。義城嶺[跳-兆+孛]跳上天。大澤塘咆哮入海。正與麼時。且道。承誰恩力。卓主丈云。萬年千歲一烏藤。

復舉。開山空照禪師。每喚云。主人翁。諾。惺惺著。諾。他時異日。莫受人瞞。諾諾。

師拈云。空照老人。打箇獨脚雜劇。觀者雖眾。笑者還稀。新瑞巖。今日到來。未免出隻手。與主丈子。更打一場春。乃喚主丈子一聲。卓一下云。惺惺著。又卓一下云。他時異日。莫受人瞞。連卓二下云。莫有解笑者麼。三十年後。

小參。祇園千樹秀。淨土九蓮敷。多少參玄士。茫茫在半途。豎拂云。看看。倫上座。尋常只是獨拈獨弄。獨自受用。今夜人天普會。凡聖交參。隨分破慳去也。若是成家立業。晝不坐夜不眠。孜孜矻矻底。以拂向左邊擊禪床云。這裏證取。若是破家散業。頭不梳面不洗。癡癡歎歎底。以拂向右邊擊禪牀云。這裏證取。其餘似信不信。欲入未入。半[旭-日+咸]半尪。半青半黃底。以拂當面一畫云。一時列下。別聽條章。忽有箇出來道。新長老。你方到此。早是手忙脚亂。後五日又作麼生。阿呵呵

。相識滿天下。知心能幾人。

復舉。乳源示眾云。西來的的意。也不易舉唱。時有僧出。源便打云。是什麼時節。出頭來。便歸方丈。

師拈云。施閃電機。用霹靂手。不無乳源。宜乎撞著一箇漆桶。若也眼似流星。要歸方丈未可。驀拈主丈云。瑞巖門下。莫有此等人麼。咩咩。

上堂。三條椽下。七尺單前。有一則語。天下衲僧。做盡伎倆。欲會會不得。擬舉舉不全。瑞巖老婆心切。略與諸人。通一線道。不容意解。只要心傳。良久云。會麼。采石渡船。

上堂。舉多福因僧問。如何是多福一叢竹。多福云。一莖兩莖斜。僧云。學人不會。多福云。三莖四莖曲。

師拈云。小小生涯。些些活計。拈弄自在。予奪可觀。須是多福始得。諸人要見一叢竹麼。卓主丈云。月篩一地影。風撼半天聲。

浴佛上堂。舉世尊初生下。一手指天。一手指地。周行七步。目顧四方。乃云。天上天下。唯吾獨尊。雲門云。我當時若見。一棒打殺。與狗子喫。貴圖天下太平。

師拈云。老胡出來。做這一解。自謂前無去人。後無來者。那知千載之下。有箇跛脚阿師。不肯放過。雖然如是。卞和之璧。不因函秦。安得天下知有連城之價。

結夏小參。以大圓覺。作麼生。為我伽藍。錯。身心安居。墮在黑山鬼窟。平等性智。蒸砂作飯團。自古自今。天下衲僧。總被籠絡。無轉身路。瑞巖今夜。與諸人勦絕了也。不妨灑灑落落。飄飄飄飄。山邊水邊行也。策芭焦杖。穿睦州鞋。草上石上坐也。飲雪峯泉。揮鹽官扇。顯無用之機。拜狸奴。揖白牯。彰不言之令。呵彌勒。罵釋迦。雖然殺活自由。以拂打圓相云。更須透取這箇。透不過。擬坐不得坐。擬行不得行。莫怪與人難共住。大都緇素要分明。

復舉。古語云。乾坤之內。宇宙之間。中有一寶。秘在形山。雲門云。拈燈籠向佛殿裡。將山門來燈籠上。

師頌云。隱隱煙村聞犬吠。欲尋尋不見人家。忽於橋斷溪回處。流出碧桃三四花。

結夏上堂。聖制中有一訣。上三星下半月。付諸人須辨別。九十日參教徹。參不徹。飲底是洋銅。吞底是熱鐵。

開徑山回嗣法書上堂。三張白紙。千里同風。此是古人。喫不盡底涎唾。爭如瑞巖。將箇季春極暄。換箇孟夏漸熱。雖然。山頭老和尚。蹉過也不知。

上堂。謝兩堂秉拂。

人天眼目。佛祖紀綱。把住放行。一一由我。由我則故是。忽然燈籠露柱。穿却拂子鼻孔。白牯狸奴。換却拂子眼睛。又且如何支遣。沙場曾慣歷。不怕陣雲高。


上堂。十五日己前。碓觜開花。十五日己後。秤槌結果。正當十五日。菜園裏兩個頭陀。携鋤削草。忽然脫落地。却是塊鐵。你者一隊漆桶。在長連牀上打瞌睡。知什麼茄子瓠子。喝一喝。下座。

謝監收上堂。舉東山演和尚。謝監收示眾云。人之性命事。第一須是○。欲得成此○。先須防於○。若是真○人。○○。

師拈云。東山老人。與麼謝監收。可謂曲盡主禮。山僧今日。亦謝監收。未免重展家風。管顧去也。人之性命。第一須是



。欲得成此




。先須防於



。若是真



人。



。會麼。東山圈。瑞巖點。多不添少不減。三世如來同箇眼。

上堂。舉趙州訪上菴主云。有麼有麼。菴主豎起拳頭。州云。水淺不是泊船處。又訪下菴主云。有麼有麼。亦豎起拳頭。州云。能殺能活。能縱能奪。便禮拜。

師頌云。南北汀洲總是蓮。不知開處有何偏。遊人移艇北頭去。想是風光在那邊

。

解夏小參。聽雨聽風。喫粥喫飯。兩個五百。元是一貫。翠巖云。一夏已來。與兄弟東語西話。看我眉毛在也無。大似小媳婦。巧語媚公姑。長慶云。生也。隨摟搜漢。保福云。作賊人心虛。阿誰信你。雲門云。關。也是里婦效顰。瑞巖與麼提唱。莫是出他古人一頭地麼。良久云。拔劍斫開人我易。推山塞斷是非難。

復舉。僧問雲峯悅和尚。西天以蠟人為驗。此間以何為驗。峯云。鐵彈子。

師拈云。久聞雲峯因桶箍爆悟道。元來見解只如此。雖然。天高誰側耳。地闊少知音。

中秋上堂。長沙與仰山翫月次。仰山云。人人盡有這箇。只是用不得。長沙云。我恰倩你用。山云。你作麼生用。長沙遂與一踏踏倒。仰山云。你直下似箇大蟲。

師拈云。大仰是則是。著甚急。長沙好則好。可惜許。而今用得用不得。且拈向一邊。以拂作指月勢云。諸人還見這箇麼。幸無偏照處。剛有不明時。

上堂。八月九月。白露寒露。水落斷崖。煙籠古樹。衲僧家。不肯放下。只管絆縳草鞋。拖條拄杖。走向東邊討西邊討。饒你計到九年。三十日夜。依前不離當處。慕召云。上座。住住。

上堂。舉雪峯示眾云。烏石嶺相見了也。望州亭相見了也。僧堂前相見了也。鵝湖見保福在僧堂前。乃問云。烏石嶺望州亭相見。則不問。僧堂前相見事。作麼生。保福低頭歸僧堂。鵝湖拂袖歸方丈。

師拈云。黑白星分一局碁。曾郎著著泄天機。於中奪角衝關妙。只許鵝湖保福知

。

冬至小參。六陰剝盡。禿頭蒼帚。門後排班。一陽復生。斷耳草鞋。路傍作舞。諸方到處。樓頭動鐘。堂上擊鼓。引得一隊老楸槌出來。口吧吧地。又何曾知有這箇消息。瑞巖不是點胷。減人聲價。只要現前一眾。回頭轉腦。轉腦回頭。沒來由處識來由。惱亂叢林卒未休。

復舉。明招示眾云。這裏風頭稍硬。且歸暖處商量。明招歸方丈。大眾隨入。明招云。纔到暖處。便見瞌睡。以主丈子。一時打出。

師頌云。前頭計較既不成。後面安排亦不是。古時若有今時人。不落他家繯[袖-由+貴]裏。

臘八上堂。二千年前野狐精。無端夜半踰城。走向雪山去。不知廢幾途程。及乎一見天上星。瞎却雙眼睛。累及後代兒孫摸壁行。瑞巖與麼道。也是為他閑事長無明。

除夜小參。年窮歲盡。夜靜更深。將箇什麼。與大眾分歲。若烹北禪牛。酌曹山酒。擘雲門餅。點趙州茶。又是諸人尋常。用了底科段。未免拈出多年死猫頭。剔骨刮髓。細切零花。聊伸管待。卓主丈云。果然幾箇無思筭。喫了通身冷汗流。

復舉。滄山問仰山。即今事不問。自古事。作麼生。仰山叉手進前而立。滄山云。猶是即今事。自古事。作麼生。仰山叉手退後而立。山云。汝屈我。我屈汝。

師拈云。自古即今。進前退後。父子家私。一時抖擻。抖擻則不無。只如道汝屈我。我屈汝。又且如何分割。三隻骰子擲十九。

歲旦上堂。年新月新。日新時新。禪道新。佛法新。拂子主丈一齊新。如何見得。卓主丈云。元正啟祚。萬物咸新。

上堂。瞿曇乾屎橛。達磨潑草鞋。衲僧覷不破。隱隱在胸懷。休休。瑞巖一時屏却。向無摸索處。指箇成現生涯。擲下主丈。何似雲門一橛柴。

上堂。主人公有時瞞頂。主人公有時分曉。瞞頂箇箇喜懽。分曉箇箇煩惱。今將煩惱分曉。撥置左邊。喜懽瞞頂。颺在右畔。又向何處。見主人公。響。展兩手云。了。

上堂。舉忠國師。一日喚侍者。侍者應諾。如是三喚。侍者三應。國師云。將謂吾辜負汝。却是汝辜負吾。

師拈云。國師三喚。煙凝新綠重重。侍者三酬。風動落紅片片。這箇且止。將謂吾辜負汝。却是汝辜負吾。又作麼生話會。良久云。今春看又過。何日是歸年。

結夏小參。古佛心即于今。豎拂云。看看。道是拂子則差。道非拂子則錯。放下云。阿呵呵。何奇特。淺淺箇又甚深。劃拂云。禪家流。但向百二十日內。如是參。如是學。如是入。如是證。且畢竟。證箇什麼。擊拂云。韓幹馬嘶芳草渡。戴嵩牛臥綠楊陰。

復舉。五通仙人。問世尊云。吾有五通。佛有六通。如何是那一通。世尊。召五通仙人。仙人應諾。世尊云。那一通。你問我。

師頌云。那一通你問我。玄關倒插無鬚鎖。等閒一掣掣得開。三箇老婆相對坐。咄。

上堂。荊山有玉。獲得者不在荊山。赤水有珠。拾得者不在赤水。衲僧有無位真人。證得者出入不在面門。驀拈主丈。橫案云。會麼。幽州江口石人蹲。

上堂。舉僧問智門。蓮花未出水時如何。蓮花。出水後如何。荷葉。

師拈云。大小智門。只解截斷眾流。不能隨波逐浪。忽有人問瑞巖。蓮花未出水時如何。荷葉。出水後如何。蓮花。且道。是截斷眾流。是隨波逐浪。參。

祈晴上堂。以主丈劃云。劃斷萬里癡雲。復打圓相。放出一輪杲日。於是大地草木。獲斯光明。直得葉葉枝枝。葱葱蔚蔚。且道。是誰恩力。擲下云。天台山朱亞。九公採得。

上堂。舉僧問趙州。狗子還有佛性也無。州云無。僧云。蠢動含靈。皆有佛性。為甚狗子無。州云。為他有業識。在。

師頌云。丁出丁楔出楔。老趙州端的別。別別。金剛腦後三斤鐵。

上堂。水瀉巖前。蛩吟砌下。問著衲僧。有口如啞。百二十日。弄真像假。豎拂云。今朝突出拂子頭。淨倮倮赤洒洒。沒可把。見麼。擲向背後云。又入鼻孔裏去也。

上堂。秋雲秋水兩依依。劈腹剜心。塞鴈聲聲度翠微。將謂忘却。多向洞庭芳草岸。誰。楚天空闊不知歸。不勘自敗。五祖老人。些兒活計。盡被瑞巖沒藉了也。莫有不甘者麼。顧視左右云。德山道底。

中秋上堂。月月光皎潔。本無圓何有闕。堪笑馬簸箕。於此時。諸子紛然。競呈醜拙。或道修行。或言供養。或拂袖而去。阿呵呵。與麼顯發本地風光。何異接竹點月。掉棒打月。

上堂。瑞巖老還債。出生雙耳聵。扣道道不知。問禪禪不會。怕冷收帽裙。愛涼解衣帶。上下相依不相怪。由來彼此肚皮大。

重九上堂。九日重陽節。淵明採菊時。黃花到處有。何止在東籬。諸人若也不信。且看折取一枝。拈主丈云。見麼。雨中雖好。霜後尤奇。

上堂。舉趙王見趙州。趙州據坐禪牀。乃云。大王會麼。王云不會。州云。自少持齋今已老。見人無力下禪牀。

師頌云。華山突兀聳蒼穹。坐斷坤維千萬峯。潘閭騎驢山下過。只聞啼鳥鬧春風。

謝藏主上堂。舉昔有僧。在經堂中坐。不看經。藏主問云。上座何不看經。僧云。不識字。藏主云。何不問人。僧乃叉手云。是什麼字。藏主無語。

師拈云。者僧經雖不看。偈翻一十二分教。藏主字雖不說。埽盡二十四家書。注了也解了也。諸人還見節文麼。拍禪牀。下座。

上堂。游魚澗底沉浮。幽鳥林間上下。那堪東園刈麥。西疇插秧。小姑摘葉飼蚕。公子揚鞭走馬。酌然無異。諸人長連牀上。展鉢開單。喫粥飯。咬著砂者。有麼有

麼。無也無也。

上堂。舉麻谷見臨濟。展坐具乃問。十二面觀音。那面正。臨濟下禪牀。一手取坐具。一手擒麻谷云。十二面觀音。向甚麼處去也。麻谷轉身擬坐。臨濟拈主丈打麻谷。麻谷接却主丈。相捉歸方丈。

師拈云。大眾春務當時。各人擔擔[土*盍][土*(天/非)]。向自家田地上撥撒。也不怪它。只是狼藉太煞。

結夏小參。四月十五日已前。少則不減。七月十五日已後。多則不添。不添不減。已後已前。且拈向一壁。畢竟九十日內事作麼生。乃豎拂云。這裏見得。折脚鐺。共你左挈右提。擊拂云。這裏聞得。破沙盆。共你東拈西掇。若還見似不見。聞似不聞。未免被瑞巖拂子。翳却眼睛。塞却耳朵。擲拂於背後云。跳上三十三天去也。喝一喝。

復舉。雲巖埽地次。道吾云。太區區生。巖云。須知有不區區者。吾云。恁麼則有第二月也。巖豎起苕帚云。者箇是第幾月。吾休去。

師呵呵笑云。大小雲巖。埽地也不了。若是臨濟兒孫。倒轉苕帚柄來。多少時也。

能仁西巖和尚至。上堂。舉芙蓉和尚。訪實性大師。大師上堂。拈主丈。向左邊云。若不是芙蓉師兄。也大難委悉。

師拈云。實性大師。與麼施設。大似將蒿湯。當禮儀。瑞巖今日。能仁師兄到來。雖有主丈子。只是不動著。何故。彼此同出師門。

上堂。嶄嶄巖石。蔚蔚松蘿。左枝右蔓。橫牽豎惹。滿地交羅。幾人遭絆倒。反怪葛藤多。阿呵呵。跳不出時爭奈何。

上堂。舉僧問巖頭。古帆未掛時如何。巖云。後園驢喫草。又問。古帆掛後如何。巖云。小魚吞大魚。

師頌曰。後園驢喫草。開口見心肝。潘閻倒騎處。有誰能解看。

又頌曰。小魚吞大魚。尾巴露一橛。漁翁醉不知。空把絲綸掣。

解夏小參。主人翁。轉轉轉。有手脚。無背面。或向深山裏。敲冰釣魚。或向鬧市中。炙火搖扇。堪笑禪和子。長在蒲團上。東討西尋。直是不得一回親見。當此自恣。將何證驗。瑞巖今夜事不獲已。未免擘破面門。開箇方便。拍禪牀云。秋風一陣晚來寒。吹斷白雲三四片。

復舉。一僧參趙州。州喚僧云。近前來。僧近前。趙州云。去。

師拈云。大眾。這僧幸自可怜生。無端被趙州一條無絲線子。纏倒了也。

上堂。舉六祖因風颺刹竿幡動。有二僧對論。一云。風動。一云。幡動。往復未決。六祖云。不是風動。不是幡動。仁者心動。二僧悚然。

師頌云。蕭蕭黃葉埋荒徑。靄靄浮雲鎖野堂。一陣西風俱掃盡。幾根喬木倚斜陽。

上堂。轉身動脚。開口露牙。明明是我。的的非它。衲僧不肯向省要處受用。甘自區區於道途之上。真可惜誠可嗟。瑞巖老婆心切。未免為汝指箇歇處。便請急急回首。早早歸家。擲主丈云。耶耶。

除夜小參。年窮歲盡。歲盡年窮。有一物墨漆黑。屈屈曲曲。牙牙槎槎。恰似多年老梅樹。拽不動拗不折。雲籠無影。風撼無聲。盤礴在乎無陰陽地上。還有知得底也無。若是未明枝節。未識根株。山僧不免與諸人指出。驀拈主丈提起。啞。元來是箇主丈子。

復舉。僧問靈觀和尚。如何是佛。靈觀吐舌示之。其僧禮拜。觀云。見箇甚麼道理。便禮拜。僧云。謝和尚吐舌相示。觀云。老僧近日。舌上生瘡。

師拈云。進前參退後領。者僧故是作略。爭柰不能坐斷靈觀舌頭。當時待他問見箇甚麼道理。便禮拜。但呵呵大笑。管取吐出了縮不得。

上堂。南泉賣身。只貪小利。道吾舞笏。一味鬼戲。百丈捲席。翻成鈍置。趙州喫茶。太煞客氣。老大隋更是沒巴鼻。僧問佛法的的意。却道。山前麥熟也未。咄咄。

解夏小參。有啐啄時。病根非淺。無捫摸處。過跡更深。豈不見。老宿一夏已來。並不與師僧語話。早是淨地上。堆堆[土*盍]了也。有僧自嘆云。我只與麼空過。不敢望說佛法。得聞正因兩字。也得。太伶俐生。老宿聊聞云。闍梨莫[斯/言]速。若論正因。一字也無。不勘自敗。與麼道了。遂叩齒云。適來無端。不合與麼道。大似落井攀攔。鄰壁老宿聞云。好一釜羹。被兩顆鼠糞污却。相罵饒汝接觜。相唾饒汝潑水。古人則且置。只如瑞巖。九十日內。與兄弟。東道西話。無有不知者。且道。那一句子為人。不妨對眾。露箇消息看。有麼有麼。良久云。作家作家。

復舉。昔日有僧。問保寧。如何是佛。保寧云。鐵鎚無孔。

師拈云。大小保寧。只道得一半。若有人問瑞巖。只對他道。無孔鐵鎚。大眾會麼。鐵槌無孔。無孔鐵槌。當面便擲。不問是誰。

上堂。一夏已過了。生涯又復然。眉毛橫眼上。鼻孔搭唇邊。諸人若果疑情未決。但向冷地裏。摸索鼻孔看。切忌羸心。和眉毛一齊打失。

上堂。鴈山雲。台嶠月。或卷或舒。或圓或缺。兩兩三三。朝遊暮往。袈裟角主丈頭。挑底挑裊底裊。不妨自怡自悅。若到瑞巖。定是打教棒折。何故。而今什麼時節。

上堂。舉僧問趙州。如何是祖師西來意。州云。庭前栢樹子。僧云。和尚莫將境示人。州云。我不將境示人。僧云。如何是祖師西來意。州云。庭前栢樹子。

師頌云。老姑強作少年時。爛把宮嬙紅粉施。不管旁邊人冷笑。滿頭猶更插花枝

。上堂。方見正月初一。又是臘月十五。一年與諸人。東說西說。橫說豎說。更無一句子靈驗。今日不免披肝露膽。直說去也。下座。

歲除小參。臘月三十日。一歲已周畢。野老競相呼。把火門外立。唯有瑞巖拂子。都不知寒暑變遷。時節移易。長時毳毼地。在牀角頭。動是與人天為冤對。佛祖為讎敵。今夜信手拈來。擊拂云。橫敲豎擊。也只要現前一眾。共相委悉。若還依舊。心頭墨漆黑。阿呵呵。又爭怪老僧得。

復舉。北禪除夜示眾云。年窮歲盡。無可與諸人分歲。且烹一頭露地白牛。炊黍米飯。向檣柵火。唱村田樂。且恁麼過。何故。免見倚他門戶。傍他牆。剛被時人喚作郎。便歸方丈。時有倚遇上座。入方丈喚和尚。門外有公人來。禪云。作甚麼。遇云。道勾和尚不納筋角。禪遂捋下帽子。擲地上。遇乃拾之。禪捻住云。捉賊捉賊。遇却將帽子覆頭云。天寒且還和尚。禪呵呵大笑。

師拈云。異常鬪釘。出格安排。則不無北禪。檢點將來。猶是口行人事。遇上座。雖解相席打令。未免揣括家私。以拂子一劃云。一狀領過。且道。瑞巖又作麼生施設。擲拂子於背後云。夜深珍重。

上堂。禪不用參。道不用學。放下更放下。安樂又安樂。天下老和尚。不識好惡。紛然出來。垂一機示一句。道我發明者話。殊不知。擬心便差。開口便錯。良久云。錯錯。

謝郭繼一處士。上堂。舉白雲端和尚。因郭功父至。示眾云。山僧夜來枕上。作得箇山頌。不唯謝功父。直要脫却天下衲僧。著肉汗衫。乃云。上大人。丘乙己。化三千。七十士。爾小生。八九子。佳作仁。可知禮也。

師拈云。白雲老人。好箇說話。柰何颺在無事甲裏者多矣。瑞巖今日拈來。下箇注脚。不唯謝繼一處士。直要穿却天下衲僧鼻孔。乃云。上大人(。丘乙己)。化三千-。七十士|。爾小生/。八九子\。佳作仁●。可知禮也



。擲拂子。下座。

上堂。舉外道問世尊。不問有言。不問無言。世尊良久。外道云。世尊大慈大悲。開我迷雲。令我得入。師頌云。自把碌磚空裏擲。必端自打自家頭。酌然自痛自難說。自著摩挲歸去休。

上堂。舉子胡示眾云。三十餘年住子胡。二時粥飯氣力羸。每日山上三兩轉。問汝諸人會也無。

師拈云。子胡老漢。雖無一點佛法身心。猶要敲針作鈎在。若是山僧。則不然。三四餘年住瑞巖。是非擔子一肩擔。蛇吞鱉鼻狗咬犬。一一分明不用參。

結夏小參。寒暑遷移。光陰倏忽。轉眼又見結夏也。山僧雖與現前大眾。眉毛相結。鼻孔相拄。要且飯各自喫。屎各自屙。牀各自眠。夢各自做。是則也是。忽然把不恰好。輕輕一捏。又却頭紅面赤。良久云。雪峯語巖頭。

復舉。女子出定話。

師頌云。鮑叔眼下安眉。趙哥口邊著耳。驀然狹路相逢。兩箇是甚面觜。

請殿主上堂。寬用工。急著限。是也剗。非也剗。頂[寧*頁]忽然突出眼。圈圈圖圖。一似古殿裏。壁角落頭。破燈盞。

佛鑑和尚遺書至。靈前拈香。者老和尚。元無所向。一味麻皮頭。做出萬般[打-丁+羨]。我也無端被伊葛藤一上。慚愧樁子倒了也。銜怨銜恩。含悲含笑。燒一炷香供養。

上堂。古者道。結夏已十日也。寒山子作麼生。又有道。結夏已十日也。水牯牛作麼生。瑞巖者裏。又且不然。結夏已十日也。寒山子。牽一頭水牯牛。向雙眉塘畔喫草。忽然顛發。走到僧堂前。笑你一隊瞌睡漢。騎箇牛又覓箇牛。不知千頭萬頭。元只是者一頭。[口@力]一聲。下座。

上堂。舉一僧往臺山。路逢一婆子。乃問。臺山路向什麼處去。婆云。驀直去。僧方行三兩步。婆云。好箇阿師。便恁麼去。其僧舉似趙州。州云。待我去勘破者婆子。州去亦如是問。婆子亦如是答。州歸謂眾云。臺山婆子。被我勘破了也。

師頌云。庭前新吐一花紅。襲襲馨香醉蜜蜂。公子見來情興動。倒吹玉笛弄春風。

法眷至上堂。我有一機。覷面提持。如擊金石。如奏篳篥。不是知音誰共知。

行在歸上堂。南山鱉鼻蛇。北山白額虎。夜半三更。忽地[病-丙+斯]咬。天竺圓通大士。路見不平。一喝喝住。山僧正在橘園亭畔做夢。被伊驚覺。一笑歸來。且道。歸來後如何。惺惺石迸長長筍。滴滴泉翻浩浩波。

謝梁山居士上堂。舉丹霞訪龐居士。路逢靈照女。問居士在麼。靈照放下菜籃。叉手而立。丹霞再問。居士在麼。女子提起菜籃便行。丹霞遂回。女子乃舉前話與居士。士云。丹霞在麼。女子云。去也。士云。也是赤土塗牛糞。

師頌云。小姑將彩對花縫。半是深青半是紅。被賊一時偷去了。渾家空自暗搥膺。

雨[雨/酸]寒食。日醞清明。三三兩兩。呼喚踏青。禪家流無處著幽情。倒卓烏藤倚石屏。閑聽巖前杜宇一聲聲。

上堂。聞聲悟道。拍禪牀云。者箇豈不是聲。道作麼生悟。見色明心。豎起拂云。者箇豈不是色。心作麼生明。直饒悟得明得。我更問你。觀世音菩薩。將錢買胡餅。放下手。因甚却是饅頭。喝一喝。下座。

解夏上堂。舉僧問雲門。秋初夏末。前途忽有問。將何祇對。門云。大眾退後。僧云。過在甚處。門云。還我九十日飯錢來。

師拈云。入虎穴探虎子。也不易。者僧爭柰死在平地上。大眾要識雲門麼。一脚短一脚長。

上堂。舉慈明室中。安一盆水。盆上橫一柄劍。劍上安一編草鞋。凡見僧來。便指。擬議。便打。

師頌云。百花叢裏躍鞭過。俊逸風流有許多。未第儒生偷眼覷。滿懷無奈舊愁何。

上堂。秋山色老。秋樹葉零。秋雲影亂。秋水波澄。伸手縮手。取之不得。開眼合眼。視之無形。五湖衲子。披披搭搭。哆哆和和。那裏秤量。者邊匹配。瑞巖老漢。却不敢與之較重較輕。何故。斤兩分明。

上堂。舉丹霞因到一村院。天寒。取木佛。爐中燒。院主見云。何得燒我木佛。丹霞以杖撥灰云。吾燒取舍利。主云。木佛豈有舍利。霞云。既無舍利。何責我乎。主後眉鬚墮落。

師頌云。村翁因事扣巫師。禍福通腸直示伊。獲得黃金家富貴。幾多空自起狐疑。

冬至上堂。僧問。記得僧問趙州。狗子還有佛性也無。州云無。此意如何。答云。殺人刀活人劍。進云。蠢動含靈。皆有佛性。因什麼狗子無。答云。賣寶撞著瞎波斯。進云。趙州道。為伊有業識在。響。答云。海枯終見底。人死不知心。進云。僧又問。狗子還有佛性也無。州云。有。答云。活人劍殺人刀。進云。既有。因什麼。入者皮袋。答云。韓獹逐塊。獅子咬人。進云。趙州云。知而故犯。響。答云。盡信直中直。誰防仁不仁。進云。鴛鴦繡出從君看。不把金針度與人。

師乃云。昔魯僖公。登觀臺。書雲物。取驗斯辰。瑞巖雖則無能。也要隨例顛倒。以拂子指東云。者邊是黃雲。復指西云。那邊是白雲。且書者何事。乃作書字勢云。侍者不得妄通消息。

能仁和尚至。上堂。東海南西海北。中有鴈蕩大龍湫。層層立萬仞懸崖。落落瀉千尋飛瀑。白頭翁長年屈膝坐地只管看。聽得更樓山一聲鼓響。番轉頭來。與惺惺石上瞌睡漢。商量細大法門。商量則不無。提起袈裟環云。且道者箇作麼生。羅公照鏡。

上堂。學道參禪。別無方便。鬧中底靜裏明。靜裏底鬧中薦。坐斷兩頭。打成一片。喜歡豎瞋拳。煩惱呈笑面。阿呵呵。瑞巖與麼道。大似落湯螃蟹。七手八脚。一

時露現。

結夏小參。心心。拙婦穿穴針。智智。巫師罵土地。道道。矮子肩栲栳。佛佛。烏鴉啗腐骨。瑞巖今夜。把三百六十骨節。八萬四千毛竅。盡底抖擻了也。眼目定動者。一任零零星星。拏將去。撮將去。其或懵然不曉。未免自收自斂。自內自藏。且聽伊九十日內。茶裏飯裏。橫咬豎吞。行時坐時。東覷西捕。忽爾脚踏手蹉。倒地一番。山僧從而不懼羞恥。擘破面皮。遂展手云。兩手分付。

舉。僧問雲門。如何是諸佛出身處。雲門云。東山水上行。後來圓悟道。若是天寧。即不然。忽有人問。如何是諸佛出身處。熏風自南來。殿閣生微涼。

師拈云。一箇跛脚子。一箇巴頭子。互相發明。故是作家。其奈松柏千年青。不入時人意。

斷橋和尚住天台國清教忠禪寺語錄

侍者 編

山門。盡大地是箇解脫門。為什麼把手拽不入。喝一喝。不會做客。勞煩主人。佛殿。坐底立。立底坐。我即你。你即我。畢竟燒香禮拜誰。插香云。幾成話墮。

太師祠堂。宏施韜略。密展謀猷。胷中浩氣。遠邁伊周。玉爐香噴幾千秋。

方丈。我此一關。無背無向。擬欲進前。網在頭上。

陞座。拈香祝

聖畢。乃云。天台北畔。石橋南邊。中有招提。號曰方廣。今當半癡半默。半聾半啞。底老僧。為主。寒山拾得把定關津。然後豐干管領五百輩。無地頭漢。普請拗折主丈。割斷草鞋。各出隻手。扶持住山鋤斧。直得三邊雲淨。一國風清。樵牧懽呼。禽魚鼓躍。正與麼時。且功歸何所。一爐沈水謝閻丘。

復舉寒山拾得。問豐干和尚。古鏡不磨時。如何照燭。豐干云。冰壺無影像。猿猴探水月。寒山云。此是不照燭也。更請道。豐干云。萬德不將來。教我道什麼。二人禮拜而退。

師拈云。幸然好一面古鏡。無端被寒拾豐干。強加繪畫。清明者逝矣。新國清。忍俊不禁。未免重為發揮去也。豎拂云。不待高懸起。蚩尤已失威。

當晚小參。建法幢立宗旨。現成爐鞴。不用安排。延奇衲接俊流。本分鉗鎚。何妨施設。全機把定。照用並行。一線放開。主賓互立。這箇是新國清尋常制度。忽若雙澗水流。或緩或激。五峰雲起。或低或高。又作麼生定當。良久云。伯牙撫琴。

復舉。永明潛禪師。因僧問。達磨西來。傳箇什麼。永明云。傳箇策子。僧云。與麼則心外有法。明云。心內無法。

師拈云。問者如棒打空。答者似刀割水。多少學語之流。生理向策子裏。敢問大眾。達磨西來。畢竟傳箇什麼。以拂子搖曳云。風獵虬鬚。月搖鳳尾。

次日。為太師越國公上堂。乃云。大鈞獨運。撼動乾坤。大用全提。奔忙日月。直下佩毗盧正印。按王庫寶刀。一生一殺。韜略雙全。一放一收。文武兼備。折犬芋於北虜。叱蛇豕於西戎。遺德在乎生民。大勳勒乎彝鼎。故乃超越今古。獨步雲霄。出沒死生。如遊園觀。正當與麼時如何。擊拂云。不離碧油幢世界。全身已在梵王宮。

結座。紫簫聲斷月初斜。笑指蓬瀛是故家。十二玉樓尋不見。手攀仙鶴步煙霞。

涅槃上堂。始從鹿野苑。終至跋提河。於是二中間。未嘗說一字。大眾。黃面瞿曇。多虛少實。供下死歟。無人翻得。年年花[土/]競芳時。拍禪牀云。東風一陣成狼藉。

三月旦上堂。梨花李花白。杏花桃花紅。的的正法眼藏。的的古佛心宗。靈雲老幾曾夢見。道得底都是脫空。耐螺江釣魚船上翁。絲綸倒把攬春風。

上堂。金佛不度爐。道士念蘇嚧。木佛不度火。嵩山打鼃墮。泥佛不度水。鍾馗嚇小鬼。真佛屋裏坐。嘎。趙州老漢。敗露了也。大眾。若還未知。更聽國清擘破面皮揭示看。以手作擘面勢。何似鍾山寶公。

佛鑑和尚忌拈香。你是川僧。我是浙僧。相逢相見。元似不曾。因何今日成冤憎。不見道。臭肉來蠅。

四月八上堂。紅日昇兮。慧目明而不晦。白雲吐兮。慈容露而不遮。林木交加兮。胸題卍字。峰巒重疊兮。足躡千花。好箇天然古釋迦。若謂今朝始誕梵王家。苦哉佛陀耶。苦哉佛陀耶。

結夏小參。恢張法要。一喝裏分主分賓。大闡宗綱。三句中具殺具活。此乃先輩狗偷鼠竊之技能。山僧自生下來。雙耳聾兩眼瞎。推不去托不來。隈隈[毯-炎+佳][毯-炎+佳]。儻儻侗侗。一夏百二十日。雖與大眾同行同住。同坐同眠。且無針頭線脚之銜耀。然雖如是。山門外兩箇金剛。為甚麼弩目瞪眉。擊拳執杵。咩咩。

復舉。南泉因兩堂首座爭猫兒。南泉遂提起云。道得則不斬。兩堂無語。南泉斬却猫兒。晚下趙州歸。南泉舉前話。趙州將草鞋。戴頭上而出。南泉云。子若在。救得猫兒。

師頌云。送春臘欲舉金樽。客不開襟怎與論。自飲一盃歸去後。喜逢家樂鬧黃昏。

謝頭首秉拂上堂。虛空消殞。擡頭磕破腦門。大地平沈。動脚踢傷拇指。國清一眾。箇箇皮下有血。眼裏有筋。還曾如此也未。儻若遲疑。更須高著眼看。拋拂子於背後云。片雲歸似陣。擲下主丈云。流水去如飛。

上堂。舉三聖問雪峰。透網錦鱗。未審以何為食。峰云。待汝出網來。却向汝道。聖云。一千五百人善知識。話頭也不識。峰云。老僧住持事繁。

師拈云。賓則鳳舞丹霄。主則龍驤碧漢。二大老。可謂是一賓一主。彼此得宜。爭柰籬雀井蛙。紛然喧啾。不知其所向。

上堂。五峰影裏。雙澗聲中。有大寶藏。八面玲瓏。諸人在此著到。許多時節。因甚眼看不出。口說不通。山僧今日。直下打開去也。豎主丈云。者箇是秘魔一把杈。橫主丈云。者箇是道吾一柄劍。打三圓相云。者箇是雪峰三箇木毬。阿呵呵。且不似曹溪路上剎竿頭。風動幡。幡動風。自南自北。自西自東。

六月半立秋。上堂。德山低頭。夾山點頭。俱抵豎起手指頭。玄沙[祝/土]破脚指頭。提起主丈云。都來不出山僧主丈頭。何以見得。卓主丈云。一葉落天下秋。

黃蘗直山和尚至。兼謝監收。上堂。佛祖命脉。危若懸絲。赤手扶持。還他作者。筭子與籌子。論義。勝負未問諸人。黃蘗打臨濟六十烏藤。且道。那一个打不著。良久云。明眼難瞞。

解夏小參。長期百二十日。一眾心如墻壁。笑看無位真人。面門自出自入。住山老漢。贏得[病-丙+斯]澗[泳-永+盾]。隨搜搜。且免橫磕豎敲。左提右挈。拔眼中屑。抽腦後釘。解無粘之粘。去不縛之縛。而今一夏已圓。幸有東山遺下陳年鐵酸餡。花擘將來。普同供養。卓主丈云。塞破飢腸休悵悵。打拳自有喫拳時。

復舉。僧問雙泉。西天以臘人為驗。未審此間。以何為驗。雙泉云。足不履地。

師云。諸人還見雙泉麼。忽有人問雙澗。只答他道。頭不頂天。諸人還識雙澗麼。聽取一頌。足不履地。頭不頂天。纔識雙澗。便見雙泉。問有今古。答無正偏。若也未曉。細嚼黃連。

上堂。峯頭異角靈毛。澗底錦鱗鱗尾。各各性命一條。都在山僧手裏。今日放開線路。也不妨自馳自驟。自蜚自鳴。自泳自遊。自潛自躍。又阿誰管你。諸方密布漫天網子。拍禪牀。下座。

上堂。淘沙得金。鑿石得玉。張弓得鳥。擲釣得魚。應是人所求者所取者。無有不得者。唯我衲僧家。求得到有。空乎大地。取得到無。塞乎太虛。且道。因甚如此。以拂書□字。下座。

冬至小參。鴻鴻濛濛。混混沌沌。好箇大安樂法門。無端一變。便有天地日月。轉二十四氣。翻七十二候。為舒為慘。為盛為衰。為殺為生。為消為長。從上佛祖。置而勿論。汝等諸人。墮在裏許。心役役。口嘮嘮。手不停。脚不住。七顛八倒。八倒七顛。何時休歇也。國清今夜。當此陰不陰。陽不陽。普為指出大安樂法門。大家同入同證。同住大安樂法門。擊拂云。金香爐下鐵崑崙。

復舉。汾陽和尚。一日拈拄丈。示眾云。識得主丈子。行脚事畢。師拈云。大眾。撲滅不息。至於燎原。濫觴不止。至於滔天。汾陽與麼為人。禍事生也。

謝頭首秉拂上堂。翻屈書雲。命三禪者。各自執筆。向虛空中。鬪寫者箇字。或著一劃。或下一點。或點劃不全。便是孔夫子魯僖公。莫辨其文。莫知其義。諸人要會麼。遂顧視左右。乃唾一唾。下座。

上堂。舉陸亘大夫問南泉。師姓什麼。泉云。姓王。亘云。還有眷屬也無。泉云。四臣不昧。亘云。王居何位。泉云。玉殿蒼生。亘云。玉殿蒼生時如何。泉云。不居正位。

師拈云。面前趁背後逐。背後趕面前隨。陸亘大夫。猶自不知。若還知。驀拈主丈云。王老師王老師。

臘八上堂。門外一犬吠。欄前一鳥鳴。天際半鉤新月。移影上疎櫺。憶得雪山六載。凍不死。餓不殺。夜半見明星。拍禪牀。下座。

上堂。舉南泉示眾云。文殊普賢。昨夜三更。起佛見法見。各與二十棒。貶向二鐵圍山。

師拈云。南泉二十棒。打文殊普賢。可謂棒棒見血。只是罕遇知音。國清門下。寒山拾得。昨夜三更。起佛見法見。山僧棒未曾拈。各自隱身無地。為什麼如此。蛇齧草鞋。

除夜小參。心不起滅。設饌開樽送舊年。法無變遷。吹簫打鼓迎新歲。者裏著得一隻眼。心也法也。起也。滅也。變也遷也。一時百雜碎。儻不如是。依舊蘭日薰薰。荷風穆穆。菊露滴滴。梅雪飄飄。國清寺裏徐師叔。一柄無口刀。分外使得著。

復舉。僧問琅琊。清淨本然。云何忽生山河大地。瑯云。清淨本然。云何忽生山河大地。

師頌云。一從醉別畫堂前。鬢亂釵橫語笑顛。最是惱人腸肚處。借婆裙子拜婆年。

上堂。拈拂云。正朝握拂。埽蕩窠窟。左揀牛溲。右選馬淳。豎拂云。豎作一團。是甚臭鶻。擲下拂云。分付諸人。洗腸換骨。

元宵謝兩序。上堂。前堂後堂。賤賣佛法僧。監寺副寺。貴賣麻麥荳。辨龍蛇。維那槌下定當。餒驢馬。典座杓頭設施。這箇說話。雖則是直歲普請邊事。明眼衲僧到來。切忌指柳作楊。證龜成鼈。何故。水上掛燈毬。

上堂。舉仰山參巖頭。頭豎起拂子。山展坐具。頭放下拂子。山收坐具。頭云。我不重你放。只重你收。山便出去。

師拈云。一豎一展。一放一收。仰山弄險。過似巖頭。賴是隨風回櫓棹。幾乎翻却釣魚舟。

上御書國清教忠禪寺額。大而化之。之謂聖。不可測之。之謂神。故能秉須彌筆。蘸大海水。擘虛空紙。大書特書。燦然奎畫之文。直得玉轉珠回。龍驤鳳舞。輝騰今古。超越見聞。以此鎮蠻夷。清邦國。以此宣教化。獎忠勳。正與麼時。且當陽揭

示。光顯門庭一句。如何指陳。堯舜為君。稷契為臣。覺苑長敷草木春。

上堂。舉南泉。因趙州問。離四句絕百非。請師道。泉便歸方丈。州云。者老漢。尋常口吧吧地。被我一問。直得無言可對。侍者云。莫道和尚無語好。州遂與一掌云。者一掌。合是王老師喫。

師拈云。趙州老兒。念一道迷魂呪。捻一朵翻手訣。要且只禁得箇屋裏鬼。爭奈天師按劍何。

雪山梵長老至。上堂。僧問。臨濟辭黃蘗。蘗云。什麼處去。濟云。不是河南。便是河北。此意如何。答云。築著便作屎臭氣。進云。黃蘗便打。又作麼生。答云。正令當行。進云。濟約住棒。遂與一掌。又且如何。答云。得人一牛。還人一馬。進云。黃蘗召侍者。將先師禪版拂子來。意在於何。答云。糖和蜜。進云。濟亦喚侍者。將火來。又作麼生。答云。漆投膠。進云。黃蘗云。汝但將去。已後坐却天下人舌頭。為復是養子之緣。為復是據欵結案。答云。被下有帶。進云。只如雪山和尚。已出世為人。未審和尚。當時有何傳授。答云。一寸龜毛重九斤。進云。與麼則祖翁一箇破沙盆。已曾兩手親分付。答云。却被禪客啗啄。

師乃云。法身無相。檻前簇簇排青嶂。法眼無瑕。屋角翩翩度碧鴉。夾山早知有此。不向華亭船子橈下。喪盡生涯。國清與麼道。誰知有箇不仁不義。在暗地裏。嚙齒咬牙。啞。冤家冤家。

結夏小參。東邊西邊。比比驢腮馬頰。者畔那畔。紛紛鬼面神頭。是皆諸方。錐不去鈎不來。一齊輾入五峰前雙澗裏。拽履搯藤。行看雲冉冉。解衣拂石。坐聽水潺潺。瞋使寒山。笑驅拾得。牽藕絲縛住老虎。豎針眼放出大鵬。彈指越萬年。展眸終一夏。者箇猶是現前大眾。自受用三昧。且住山分上。又作麼生。紅莧葉間敷芍藥。紫荊花底結林檎。

復舉。趙州與文遠論義。鬪劣。不鬪勝。勝者輸果子。遠云。請師立義。州云。我似一頭驢。遠云。我似驢胃。州云。我似驢糞。遠云。我似糞中蟲。州云。你在彼。做什麼。遠云。過夏。州云。把將果子來。

師拈云。趙州布偃月一字。文遠排斗底八門。及乎兩陣交鋒。到了則成兒戲。是則也是。把將果子來。是劣義耶。勝義耶。

上堂。計較盡處。商量極時。元來不是。了了常知。耐耐一箇齷齪漢。非風動。非幡動。錯下針錐。便有一喝。耳聾三日。連喫痛棒。似拂蒿枝。自後豎起竹篋。擲金圈拋栗棘。不容湊泊。那許思惟。渾崙鐵酸餡。雜碎破沙盆。咬嚼者。愈辛愈辣。扶持者。轉嶮轉危。而今總在國清手。可不拈出當陽設施。驀喚侍者。指西邊云。烏那裏是阿誰。

上堂。舉德山一日飯遲。托鉢赴堂。雪峰云。鍾未鳴。鼓未響。托鉢向甚處去。山低頭歸方丈。峯舉似巖頭。頭云。大小德山。未會末後句。山遂喚頭問云。你不肯

老僧那。頭密啟其意。山休去。次日上堂。果與尋常不同。頭至僧堂前撫掌云。且喜者老漢。會末後句也。雖然。只得三年活。三年後。果遷化。

師頌云。竇八抽身已敗賊。偷兒曲為巧遮藏。一家著賊猶閑事。攪斷平人幾肚腸。

請監收上堂。舉瀉山問仰山。甚處來。攔頭坐關。仰云。田中來。野老敘寒溫。瀉云。田中禾。好刈也未。布梯下井。仰云。好刈也。酒後[病-丙+斯]罵。瀉云。作青見。作黃見。作不青不黃見。鑊鈎搭索。仰云。背後底。是什麼。揭起蓋面帛。瀉云。子還見麼。倒轉鎗頭。仰於地上。拾一穗稻云。和尚何曾問者箇。貧子打翻蓆袋。瀉云。此是鵝王擇乳。喝一喝。訝郎當漢。又與麼去。更有一轉語。不在瀉仰分上。諸人已知了也。知則不無。且作麼生舉。良久云。賴有監收證明。

解夏小參。伸手推出枕。八九六十三。舉足踢起磚。五七四十二。伶俐漢。才得者一捏子。便把須彌山。掇安額上。大海水。傾入耳中。隨羣逐隊。向長連牀。聚頭打睡。山僧尋常。眼孔闊。肚皮大。未嘗管著。今夜普請。開布袋頭。不可放過。依舊喚來。携帚。挈糞箕。與眾執役。但是堂前厨下。門口路頭。切不得喘氣。何也。近日國清。正令已行。

復舉。仰山參東寺。寺云。你是甚處人。仰云。廣南人。寺云。我聞廣南有鎮海明珠。還收得否。仰云。收得。寺云。未審珠作何色。仰云。白月即現。黑月即隱。寺云。何不呈似老僧。仰叉手進前云。昨到瀉山處。被索此珠。直得無言可對。無理可伸。

師頌云。明珠璨璨對人傾。是甚多年魚眼睛。拋撒滿前收不上。糞箕帚亂縱橫。

上堂。滿眼覷著。滿耳聽著。伸手觸著。舉足踢著。那更開口道著。禪家流。東邊參。西邊學。泊乎一問。剗地卒討頭鼻不著。山僧有箇萬病丸。雖無甚靈驗。遇斯等人。恰用得著。要會麼。良久云。放下著。

九月半上堂。煙橫大野。鴈篆長空。玉露滴開。八枝九枝黃菊。金風剪下。三片兩片丹楓。吾家生涯。雖然冷淡。驀拈主丈云。取之無禁。卓云。用之無窮。忽有問。長老。你又將常住物。作私己受用。也只向道。非但今日。從前多少事。盡在不言中。

上堂。舉僧問馬大師。離四句。絕百非。請師直指西來意。馬云。我今日勞倦。不能為汝說。問取智藏。僧問藏。藏云。我今日頭疼。不能為汝說。問取海兄。海云。我到者裏。却不會。僧回舉似馬師。師云。藏頭白海頭黑。

師拈云。馬師如抱焦桐。悠揚品弄。那堪二子隨後。引指按徽。何啻水漱百灘。風吟萬壑。無奈座中對客。不別宮商。翻然轉調。且道。轉底是什麼調。未識琴中趣。徒聽絃上聲。

開爐上堂。叢林冷落。無甚今時。諸方老宿。雖則煨幾塊死柴頭。各自煖熱門戶。其奈東挑西撥。橫[打-丁+穴]豎吹。和自家底。一齊烏了。山僧者裏。不問大箇小箇。乾箇濕箇。收拾堆在爐中。火種星兒。深與埋著。待伊時節自到。大眾。時節到也。以拂作撥火勢。嘎。煙焰逼人。

上堂。舉僧問雲門。殺父殺母。佛前懺悔。殺佛殺祖。甚處懺悔。門云露。

師頌云。掃蕩邊塵未著勞。折弓戲把射青霄。滿攀自覺無多力。隨手那知落一鵬。

聖節上堂。輓雪峰毬。打禾山鼓。露柱燈籠齊作舞。引得老豐干。倒跨南山虎。何謂耶。聖人作。萬物覩。

臘八上堂。釋迦老子。不依本分。半夜走入雪山。凍得觜喙。餓得眼白。渾無理會。突然道箇奇哉。自此顛言怪語。炒鬧天上人間。浩浩地聒聒地。賺度一火落。在處喚馬作驢。指南為北。國清小子。雖則住他屋。著他衣。喫他飯。直是要說他過。且道。是什麼過。仰面看天笑云。大似其父攘羊。而子證之。

上堂。舉曹山因僧問。雪覆千山。因甚孤峰不白。山云。須知有異中異。僧云。如何是異中異。山云。不墮眾山色。

師拈云。藏機設穿。一問也不易。者僧及乎轉頭。又落曹山翻車網裏。國清與麼批判。且為人眼。在什麼處。拈主丈。卓一卓。喝一喝。下座。

簡翁和尚至。上堂。彼此遊方。彼此行脚。誰知末上見人不著。一齊被他激得耳聾。惱得頭白。怨氣至今無處著。無處著。豎拂云。手裏把箇破木杓。

結夏上堂。十五日已前。黑面波斯脚踢月。十五日已後。長髭土宿手拏風。正當十五日。住山老樹生準乾屎橛。制令管束鐵彈子。一百八十七箇。東廊頭西屋下。黑律漆地。切不得動著。

謝頭首秉拂上堂。蕘桴土鼓。[泳-永+盾]泚者方別正音。元酒大羹。懵懂者始知真味。有般漢。聞得便道。我未染指。真味已知。不側耳。正音已別。啞。淳風喪矣。

上堂。雲門示眾云。平地上死人無數。過得荊棘林是好手。有僧出云。與麼則堂中第一座有長處。門云。蘇嚕蘇嚕。

師頌云。將軍令下閃旌旗。胡騎紛紛頓失威。縱有突然驍驟者。不知身已陷重圍。

上堂。知見立知。即無明本。三箇猢猻。打倒猴大。投告山王。乃為曲分尊卑。八棒十三。一等行治。知見無見。斯即涅槃。甜瓜倒地。苦瓠上棚。園神譏之曰。宜自守分。稍不順時。有刀殺你。有鑊煮你。不用填命。大眾。釋迦老子。多年按牘。國清盡底翻來。事雖有兩端。畢竟不出者箇條貫。寶祐四年。六月初一日。以拂作押字勢。下座。

上堂。舉洞山聰和尚。每自負薪上山。一日有僧。見問云。山上自有。何得將去。山放於地上云。會麼。僧云不會。山云。我要燒。

師拈云。洞山老兒。自營家火。撞著一箇。便有短長。者僧若見放薪於地上云會麼。只向道。和尚不易。縱有神頭鬼面。也做不成。

上堂。赫赫火雲。炎炎烈日。直得無位真人。汗流滴滴。雖則隨隊。搖竹扇。飲山泉。憩松陰。捫蘚石。到了只在面門出入。大眾要見麼。橫主丈面前云。元來是箇樹枝。妄動即禍生。置主丈云。且留靠壁。

送寒巖長老上堂。一住寒巖萬事休。未是放身命處。更無雜念挂心頭。喫飯屙屎。擗。閑於石壁題詩句。大好無。任運還同不繫舟。浣盆浣盆。寒山子得力句。國清已為花擘了也。就中些子誦訛。不可說破。何故。自有主在。

斷橋和尚語錄卷上

斷橋和尚住臨安府淨慈報恩光孝禪寺語錄

侍者

編

山門。有門有路。從汝諸人。東行西行。忽若新淨慈一把把斷。又向甚處插脚。喝一喝。

方丈。橫主丈云。與麼與麼。豎主丈云。不與麼不與麼。卓主丈云。只者 關作麼生過。吽吽。

陞座。拈香祝

聖。問答畢。乃云。浙東山。浙西水。言前拶透。只在脚尖。江南月。江北雲。句下挨開。不離眼底。者箇陳年葛藤。諸方老骨撾。拈弄不出。醜醜荏荏。支支離離。而今落在新淨慈手中。拽去牽來。絆倒天下衲僧。一箇箇。平吞佛祖。便見皇風普扇。惠日重輝。瑞氣靄龍樓。紫煙凝鳳闕。正與麼時。畢竟功歸何所。良久云。合國咸知。

復舉。開山祖師永明。初參法眼。問云。子參請外。看什麼經。明云。華嚴。眼云。總別同異成壞六相。是何門攝。明云。世出世間一切法。皆具六相。眼云。空具六相否。明無對。眼云。何不問吾。明却問。空具六相否。眼云。空。明於是開悟。眼云。子作麼生會。明云空。眼然之。

師頌云。空兮空兮無背面。拈起豁然成兩片。搭向南屏山角頭。千古萬古少人見。要見麼。以拂打圓相云。金烏飛上琉璃殿。

當晚小參。屏陰掩映。塔影稜層。山色空濛。湖光瀲灩。好箇二千年前。黃面老。神通游戲之所。何妨大家出手。扶起大光明幢。作新法社。三百二百踪跟漢。豈可坐視。各請分司列職。運水搬柴。廣興供養。既然如是。且新長老到來。末上一筵。如何施設。豎拂云。拂石雲隨帚。烹茶月入鐺。

復舉。雪峯示眾云。南山有一條鱉鼻蛇。汝等諸人。切須好看。一等惡物類。就中較些子。長慶云。今日堂中。大有人喪身失命。早是畏首縮脚。雲門以主丈。攬向雪峯面前。作怕勢。著他一口了也。玄沙問云。用南山作麼。咄者籃杖。以主丈劃一劃云。一時列下。還知新淨慈立處麼。擲下主丈云。耶耶。

次日陞座拈香。恭為追嚴

徽宗皇帝。上資

聖駕。乃云。一自休戈見太平。跨龍仙去彩霞輕。感恩惟有西湖水。夜夜清波蘸月明。

請化主上堂。南山有眾盈籌。總是佛祖冤讎。一夏資糧尚少。豈容坐視無謀。長安城裏。芳草渡頭。賴有作者。為我希求。要使箇箇。飽飫而優游。忽然遇維摩居士

。東指西指。又且如何對酬。一言纔勘破。笑倒老金牛。

因事上堂。三家村裏佛法。十字街頭使不著。使著則金不博金。十字街頭佛法。三家村裏用不著。用著則水不洗水。用著使不著。使著用不著。拈向一邊。且如何是佛法。南山二論師。立正義折伏魔民。往返未分勝負。燕國余令公。乃挑通事舍人。把源頭一撥。赤幡子飄然在自家手。拍禪牀。下座。

上堂。舉僧問佛日弼禪師。如何是毗盧印。日云。草鞋踏雪。僧云。學人不會。日云。步步成蹤。

師拈云。如蟲禦木。偶爾成文。佛日故得其妙。只是不能活得者僧。忽問淨慈。如何是毗盧印。豎起一掌。學人不會。攔腮便擲。是活得耶。活不得耶。

上堂。不可以有心求。魚吞直鉤。不可以無心得。狗嚙特石。不可以語言造。鳩啗活鷄。不可以寂默通。鼠咬大蟲。者四轉語。也有生有殺。也有放有收。諸人一一明得。許你四威儀中。有箇安樂處。苟或不知。後五日有人問著。莫教似仙林院裏陳闍梨。手擺鈴杵。念嚩呢嚩呢。

上堂。舉洞山示眾云。須知有佛向上事。僧云。如何是佛向上事。山云。非佛。雲門拈云。名不得。狀不得。所以言非。

師拈云。眼裏有筋。舌頭有骨。盡力道得箇非佛。名不得。狀不得。真是王小波破草鞋兩隻。

上堂。舉達觀穎禪師。示眾云。七佛是性隸。萬法是心奴。且道主人翁。在甚麼處。自喝云。七佛已下出頭。又自諾云。各自祇候。

師拈云。喚七佛為性隸。指萬法是心奴。達觀自謂。有出身路。及乎自喝自諾。又是奴隸邊事。主人翁。何曾夢見在。大眾要見麼。以拂。拂一拂云。曉來一陣春風動。開遍園林百[打-丁+羨]花。

持鉢至平江萬壽。請小參。三十年草鞋緊絆。桃花開處。始識路頭。六七箇蒲團坐穿。竹簾捲時。方見天下。者兩枚漆桶。好與三十棒。殊不知。纔生下來。呱地一聲。參學大事已畢。箇般說話。除非是姑蘇臺畔正受堂前。直指單傳老和尚。與兩山衲子。朝夕坐參。可有商量分。若是城狐社鼠。野鷺林鴉。又向什麼處啗啄。淨慈與麼匹配。與麼抑揚。大似飯羅裏插鋤。水甕中鼓杓。笑倒當年韓大伯。

復舉。寶公傳語思大。何不下山教化眾生。大云。三世諸佛。被我一口吞盡。何處更有眾生可化。

師拈云。寶公賣峭。思大詐姦。誰知打著淨慈心裏事。自出山來四十日。也無眾生可化。也無諸佛可吞。且道成得什麼事。良久云。箴籬無柄澆春風。撼動落花飛片片。

鎮江府焦山寺。請小參。佛法玄微。十字街頭。隨機展演。禪道要妙。三家村裏。遇意設施。無端一陣黑風吹。到海門國。撞著箇咬猪狗惡知識。開大爐鞴。運大鉗

鎚。烹煨大心衲子。南山佛法禪道。捏作一團。拋向揚子江心著。何故。金山寺裹山。焦山山裹寺。千人萬人題。只是者箇事。卓主丈一下。

復舉。臨濟問院主。甚處來。主云。州中糶黃米來。濟云。糶得盡否。主云。糶得盡。濟以主丈。劃一劃云。還糶得者箇否。主便喝。濟便打。後典座至。濟舉前話。座云。院主不會和尚意。濟云。你又作麼生。座便禮拜。濟亦打。

師拈云。臨濟好一條主丈。惜乎只打得兩枚漆桶。當時若打著一箇。我輩飯也無喫。

持鉢歸。閏四月結夏。小參。遊南方一遭。主丈未曾撥著會佛法底。掩彩煞人。走三千里路。布單賣却。特為此因緣來。慚惶煞人。淨慈門下。似者般箇。亦多有在。且與促長期作短期。併三限為一限。試為從頭針筍過。忽若一針便死。一筍便活。老僧未免燒好香供養。何謂也。三年逢一閏。四月見重圓。

復舉。真淨示眾云。今日乃是第二箇四月。不見古人道。放過一著。落在第二。雖然第二。依舊只是箇孟夏漸熱。阿呵呵。有利無利。不離行市。西川成都府漏籃子。一文錢三箇兩箇。撒在諸人面前。一一可以治病。又不知廬陵米作麼價。

師拈云。大眾。者陳年滯貨。颺在叢林中。少有人以眼覷著。淨慈信手拽來。用得恰好。奇哉奇哉。孟夏漸熱。前堂五日先。不動口已道了。瞌睡漢。自是當面諱却。希有希有。西川城都府漏籃子。後堂重新拈出。活一切人。不消半服。若是廬陵米作麼價。待諸人喫飯。向鼻孔裏。去老漢却與汝商量。喝一喝。下座。

上堂。舉僧問洞山。寒暑到來。如何回避。山云。何不向無寒暑處回避。僧云。如何是無寒暑處。山云。寒時寒殺閻梨。熱時熱殺閻梨。

師拈云。寒暑內橫身。寒暑外垂手。洞山自謂作家。殊不知。舌上一字關。却被者僧覷破。

上堂。山僧有一句子。在諸人分上。平平坦坦。諸人有一句子。在山僧分上。曲曲彎彎。遂舉拂云。左手串來。元是一[打-丁+兼]。右手挑起。且非兩般。為甚麼牀角頭。當面一擲。五雙十箇。取之不得。捨之又難。良久云。難難。

解夏小參。百二十日夏。有箇好說話。簸箕未動唇。苔幕先露杷。豈不見。為山問仰山。寂子今夏。在下面。作何所務。把飯喚狗。仰云。鋤得一片畚。下得一籬種。者田廩奴。為云。子今夏不空過。據本結息。仰却問云。和尚今夏。做箇什麼。看看上面。為云。日中一飡。夜後一寢。又只是麩漿果。仰云。和尚今夏。亦不空過。背後叉手。仰道了。遂吐舌。狸咬尾巴。為云。寂子何得自傷己命。救不得也。為仰家風。諸人已見了。且道。淨慈一眾。同牀聚頭打眠。各自開眼做夢。是空過耶。不空過耶。擊拂云。雙旗收電影。一劍倚天寒。

復舉。古德云。心不是佛。智不是道。

師頌云。月臨粉壁間尤白。燭入紗籠裏更紅。夜冷井邊聞落葉。已驚秋色到梧桐。

上堂。十五日前。結而不解。十五日後。解而不結。正當今日。結也休。解也休。草鞋對頰聳八耳。主丈橫身撐兩頭。五湖四海衲子為冤讎。

上堂。舉瀉山。一日見僧來參。山起身。僧云。請和尚莫起。山云。老僧未曾坐。僧云。某甲未曾拜。山云。何得無禮。

師拈云。匆匆上山者。不知山高。茫茫過水者。不覺水深。因茲家道月削日侵。遂拈主丈云。瀉山若早知有者箇。良久云。有錢買金。

上堂。庭前黃葉墜。嶺上白雲屯。風味無多子。何人共我論。忽有箇出來把住道。你屋裏。自有天來。大底活計。何得裝寒酸氣象。說冷淡語言耶。遂呵呵大笑云。知我者。其惟春秋乎。

中秋上堂。一遇中秋節。競賞中秋月。指底指。翫底翫。說底說。到了何曾離圓缺。惟愛老長沙。一踏踏倒小釋迦。光燦爛。絕周遮。不知端的落誰家。

雷峯北林和尚遺書至。上堂。西風一陣惡。北林平地摧。曉猿夜鶴。驚怨空徘徊。哀哉哀哉。戒光猶自照高臺。

上堂。舉夾山與定山。同行言話次。定山云。生死中無佛。則無生死。夾山云。生死中有佛。則不迷生死。二人是非不已。同去見大梅。便問云。未審二人見處。那箇較親。梅云。一親一疎。夾山云。那箇親。梅云。且去明日來。夾山次日又問。梅云。親者不問。問者不親。夾山住後云。我當時在大梅處。失却一隻眼。

師拈云。一人金針蒙草錦。一人玉線蹙花幔。等是機巧工夫拈出。大梅面前。覆去翻來。愈生光彩。還知夾山末後用處麼。展開懸向野堂上。百鳥驚飛不敢啼。

上堂。須彌山一座。掇向頭上。而不知重。燈心草半寸。藏在手裏。而不知輕。似者般底。可謂歎。可謂癡。可謂沒忖當。可謂無準繩。然雖如是。以主丈劃一劃云。到不平時還有聲。

上堂。舉韓文公與肇論主茶次。公曰。曾聞講得肇論是否。主曰不敢。公曰。論中有物不遷義。是不。主曰。是公撲下盞子云。者箇是什麼義。主無語。

師拈云。韓文公肇論主。喫茶也不依本分。物不遷義。固是不得而明。啞。可惜一隻盞。

聖節上堂。渚流虹影。樞繞電光。聖人出現。化洽殊方。南山祝贊一句。又且如何舉揚。合掌頂戴云。南無延壽王。南無長壽王。

上堂。舉雪峯示眾云。飯籬邊坐。餓死人。臨河。渴死漢。曾郎曾郎。三十年前。也曾與麼來。玄沙云。飯籬裏坐。餓死人。水沒頭浸。渴死漢。正是未出嶺時口款。雲門云。通身是飯。通身是水。咄。者跛子。推門一撈折脚。是飯耶。是水耶。淨慈門下。餓死人。渴死漢。且未要舉著。尋常喫飯飲水。細嚼崙吞一任你。但不得忘

來處。

請修造上堂。舉芭蕉示眾云。你有主丈子。我與你主丈子。你無主丈子。我奪却你主丈子。

師拈云。有無枝上生節。與奪節上生枝。一等弄主丈子。芭蕉老喫便宜。南山不惜出手為提持。度主丈。喚侍者云。修造司無丈竿用。權且借之。

佛涅槃上堂。日暖噴庭花。風輕搖岸柳。雙林入滅老臊胡。至今猶露摩胷手。一箇半箇。於斯見得徹去。便可流通萬世之光明。苟或不然。瞎却你眼。啞却我口。

上堂。舉趙州。因僧告辭。州云。甚處去。僧云。諸方學佛法去。州豎起拂云。有佛處不得住。無佛處急走過。三千里外逢人。不得錯舉。僧云。與麼則不去也。州云。摘楊花摘楊花。

師頌云。千尋浪裏出頭。萬仞崖前展手。七百甲子老翁。剛然弄一場醜。摘楊花摘楊花。翻身跳上樹。驚散暮林鴉。

佛鑑和尚忌拈香。拈香云。凌遲祖父只者箇。殃害兒孫只者箇。三月十八日。出驢胎入馬腹。亦只者箇。雍郎雍郎。插香云。非但報你箇。也要辱你箇。

上堂。震法雷。擊法鼓。布慈雲兮灑甘露。永嘉大師。元來是箇死水裏龍。山僧未免資其神力。看取平地驕驥變化。喝一喝云。法雷震矣。擊禪牀云。法鼓擊矣。以拂子曳云。慈雲布矣。以拂子灑云。甘露灑矣。直得山河大地。草木叢林。悉皆敷榮。悉皆鬱茂。且道。徐家園裏爛葛藤。還有者箇消息麼。提拂子顧云。芽生也。

結夏小參。拈主丈。阿呵呵。白日青天。有與麼事。主丈子突然。與諸人作頭底。一夏九十日。要住不得住。要去不得去。如落水犬。如觸藩羊。如墮檻猿。如陷穿虎。當此之時。住山老漢。豈無方便耶。須是心自肯。頭自點。主丈子。欣然與諸人開眼目。卓一下。阿呵呵。青天白日。無與麼事。

復舉。玄沙問鏡清。不見一法。是大過患。且道。是那一法。清指露柱云。莫是不見者箇法麼。沙云。浙中清水白米。從汝喫。佛法則未在。

師拈云。玄沙片舌如刀。鏡清一指似箭。笑談各展機謀。做出者般觜面。何故。不見道。漳泉福建。

上堂。似地擎山。不知山之孤峻。圭角露也。如石含玉。不知玉之無瑕。文彩彰也。若能如是。是真出家。吽。只與麼。要入淨慈門。猶隔西湖在。

上堂。舉僧問智門。蓮花未出水時如何。門云。蓮花。僧云。出水後如何。門云。荷葉。

師頌云。玉纜纖纖布嫩芽。香苞朵朵依新葉。化工底事把天機。剖腹傾心俱漏泄。

上堂。舉僧問洞山。如何是佛。山云。麻三斤。

師拈云。洞山老兒。將三寸鐵。斷天下衲僧命根。雖則歷數百年。其鋒銳凜然。淨慈今日。當面一提。血滴滴地。

八月旦上堂。白蘋洲畔。紅蓼岸頭。漁人得意。撥動孤舟。飛起一行兩行塞鴈。漾開七箇八箇沙鷗。絲綸在手。隨放隨收。時有金鱗上直鉤。

中秋上堂。兼謝百丈西堂。舉。馬祖與西堂百丈南泉翫月次。祖云。正當與麼時如何。堂云。正好供養。丈云。正好修行。泉拂袖而去。祖云。經歸藏。禪歸海。唯有普願。獨超物外。

師拈云。西堂供養。輕侵秤尾。百丈修行。短過尺頭。南泉拂袖去。芻狗趁鐵牛。馬大師幸然平似鏡。何用曲如鉤。

重九上堂。九月九。一句話。有準繩。無柄杷。惟有陶靖節知縫罇。悠然見南山。笑傲東籬下。

鬪拈化糧。上堂。拈主丈云。息慮迷源。拂塵昧己。多少衲僧。困在者裏。淨慈未免拈頭作尾。拈尾作頭。殿上三箇漢。權做老奴。堂中五百尊。暫為小使。竭力振起古家風。先祝一人壽。次鑄六軍安。三願萬民樂。然後開天門闢地戶。使長安市上。一箇箇。知道鉢盂無底。提起主丈云。等閒獲得一籌歸。卓一下云。暢殺你。快殺你。

上堂。舉僧問雲門。不起一念。還有過也無。門云。須彌山。

師拈云。湖光湛湛。野色濛濛。蓑笠一翁。酣然倦釣。驀爾撞箇。回棹轉蓬。便見雪浪千尋。雲濤萬疊。

冬至小參。春分秋分。夏至冬至。天地循環。提主丈云。是者一氣。阿呵呵。淨慈主丈子。硬糾糾。黑漫漫。超出陰陽。不居寒暑。點開釋迦眼睛。張皇半夜。敲落達磨牙齒。纏拔九年。盡天下衲僧性命。一捻捻住。求死不得死。求生不得生。因甚逗到寶祐六年。十一月十八日。在者筭座裏。預先出手露脚。卓主丈云。誌公和尚。

復舉。洞山與密師伯。到餅店。密於地上。畫一圓相云。將取去。山云。拈將來。密休去。

師拈云。將不去。拈不來。兩箇漢。一場歎。至今平地上。狼藉覆蒼苔。

上堂。十八日已前。陽消陰長。十八日已後。陽長陰消。正當今日。陰陽會合。消長混融。南山下一樹千絲檜。交枝錯節。織月梭風。翠縷一重高一重。

謝兩堂秉拂。都寺幹齋。上堂。一味禪。黑漆丈東丁西卓。頭不欠尾不全。五味禪。白瓷碗深貯淺釘。少半角多半邊。以拂打圓相云。總在淨慈縷[袖-由+貴]裏。不得動著。不得道著。何故。儉生不孝。義出豐年。

除夜小參。安眠露地牛。未脫黃金索。常在顧盼中。牧童難捉摸。當此年窮歲盡。且不似老法昌。燒榾柮柴。唱村田樂。作場笑具。蓋各人自有一頭。兩角指天。四蹄踏地。朝從湖上去。暮向嶺邊歸。橫眠倒臥。盡在南山欄圈中。自是牧者不知。騎

者不識。大眾要識麼。以拂作鞭勢云。叱。又云。[口@力]。牢把繩頭著。

復舉。僧問開先暹和尚。年窮歲盡時如何。開先云。依舊孟春猶寒。

師拈云。開先可謂因風吹火。用力不多。忽有問淨慈。年窮歲盡時如何。遣臘冰千筋。勾春柳一絲。

正月旦上堂。年年是好年。日日是好日。南山今日。好處又非常。石人起拜大人揖。因甚如此。蛇生角。虎插翼。

湖州歸上堂。煙迷岸樹。水沒汀莎。渡頭撥動釣舟。野鴨翩然飛過。翻思百丈鼻孔。被馬師一扭。至今猶自作忍痛聲。淨慈與麼道。也是望空擲石頭。

上堂。舉僧問馬祖。如何是祖師西來意。祖喚僧近前來。僧近前。祖便掌云。六耳不同謀。

師拈云。馬師道。近前來。早是六耳同謀了也。何況更打一掌乎。然制禮作樂。識周公者鮮矣。

涅槃上堂。舉世尊。於涅槃會上。以手摩胸。告眾。攢簇不得底病證出也。乃曰。汝等善觀吾紫磨金色之身。瞻仰取足。無令後悔。顛言倒語不少。若謂吾滅度。非吾弟子。謂吾不滅度。亦非吾弟子。臨危猶自說醫書。是時百萬大眾。悉皆契悟。吽吽。總是扶籬摸壁。若有一箇半箇。翻轉面皮。老瞿曇。要死也不得在。

上堂。雲收幽谷靜。雨歇幽澗鳴。風暖幽鳥語。日融幽草青。二祖不知。截斷一手臂。歸宗不會。拭壞雙眼睛。致使衲僧。箇箇半疑半信。半醉半醒。爭知道。自來滿口。咀華而嚼英。

上堂。舉滄山示眾云。行脚高士。直須向聲色裏坐。聲色裏臥。疎山出問云。如何是不落聲色句。滄豎起拂子。山云。此猶是落聲色句。滄便歸方丈。山不契。遂辭香巖。巖云。何不且住。山云。某甲與和尚無緣。巖云。有何因緣不契。山遂舉前話。巖云。某甲有箇語。山云。道什麼。巖云。言發非聲。色前不物。山云。元來此間有人。師兄去後。有箇住處。某甲却來相伴。

滄至晚。問巖。矮閣梨在麼。巖云。已去了。滄云。向你道什麼。巖云。某甲亦曾對他來。滄云。試舉看。巖云。言發非聲。色前不物。滄云。他道什麼。巖云。他深肯之。滄失笑云。我將謂矮子有長處。元來只在者裏。此子向後有箇住處。近山無柴燒。近水無水喫。

師拈云。扶其頭滄山手脚俱露。掖其尾。香巖肝膽盡傾。左右出矮師叔繯[袖-由+貴]不得。既然如是。因甚却遭他授記。擊拂下座。

結夏小參。太陽門下。日日三秋。枯枝困靈翻。明月堂前。時時九夏。止水淹俊鱗。殊不知。衲僧家。草鞋高掛龍牀角頭。著著向佛未出。祖未興。行到說不到時。說到行不到處。風凜凜地。若倚天長劍。頓在面前。誰敢正眼覷著。雖然。柄杷猶在老僧手裏。

復舉。天平到西院。居常自云。莫道會佛法。今時覓箇舉話人也無。院知有此語。一日遙見平。乃召云。上座。平回首。院云。錯。平行三兩步。院又云。錯。平近前。院云。適來者兩錯。是西院錯。上座錯。平云。某甲錯。院云錯。平休去。院云。且在者裏過夏。待共上座商量者兩錯。平當時便行。住後為眾云。我當初行脚。被業風吹。到思明長老處。被他連下兩錯。更留我過夏。待共商量。我不道恁麼時錯。未發足南方。早知道錯了也。

師拈云。進前則騰蛇遶足。退後則土宿臨頭。天平固是無奈何處。敢問諸人。西院兩錯。畢竟如何商量。縱使商量得。一夏。陳米飯。淡齏羹。也要你喫在。

上堂。舉僧問雲門。如何是佛。門云。乾屎橛。

師召大眾云。者跛脚阿師。渾身自來不淨。等閒觸著。平地上屙一堆。薰炙叢林。更無一人。以掃帚用事。以拂一拂。喝一喝。下座。

上堂。庭前柏樹子。揭示西來旨。山僧三十年已前。識破根株。見徹骨髓。應用只在開口合口間。伸手縮手裏。冷地自笑笑未已。而今提掇來。自笑也不是。伸手縮手也不是。開口合口也不是。且道。誦訛在什麼處。不是不是。

上堂。舉僧問趙州。如何是道。州云。牆外底。僧云。不問者箇道。州云。你問那箇道。僧云。大道。州云。大道透長安。

師拈云。問路底。茫茫走東走西。指路底。步步隨上隨下。淨慈與麼品題。還有為人處麼。不見道。為語助者。焉哉乎也。

解夏小參。一結結定。盡大地是箇鐵鎚杷子。在老僧手裏。橫拋豎擲。不知打破幾枚漆桶。一解解開。通十方無非大道路頭。在諸人脚下。南來北往。不知踏斷幾緉草鞋。與麼與麼。大難大難。蘆笛一聲堪著耳。又隨流水過前灘。

復舉。滄山問仰山。寂子今夏。在下面。作何所務。仰山云。鋤得一片畚。下得一籬粟。滄山云。子今夏不空過。仰山却問云。和尚今夏。作箇什麼。滄云。日中一食。夜後一寢。仰云。和尚今夏。亦不空過。道了遂吐舌。滄云。寂子何得自傷己命。

師拈云。仰山一夏不空過。脚露手穿。滄山不空過一夏。脚穿手露。古人則且止。只如淨慈。一夏七顛八倒。是空過耶。不空過耶。良久云。閻姘咬薑。趙婆呷醋。

上堂。九十日一夏。始終無縫罅。拶到末梢頭。有箇好說話。作麼生。長爪梵志註九經。瞎眼波斯書八卦。

上堂。如我按指。海印發光。汝暫舉心。塵勞先起。阿呵呵。釋迦老子。猶自作者神頭鬼面。淨慈昨請五人知事。一人頭首。五人監收。一人侍者。且不按指。亦不舉心。何故。風恬浪靜。雲淨月明。不擲金鈎。錦鱗自上。

上堂。舉南泉一日。有僧來參。叉手而立。泉云。何太俗生。僧便合掌。泉云。何太僧生。僧無語。

師拈云。王老師。一鏡當臺。胡來漢來。固不可得而逃。惜乎只撞著一箇叉手合掌鬼。

中秋上堂。心月孤圓。以拂打圓相云。好箇退下桶箍子。光吞萬象。燈籠露柱。響。光非照境。作麼生。境亦非存。且信一半。光境俱忘。大小盤山。又却與麼地。復是何物。阿呵呵。今朝八月十五日。正是中秋。十六十七十八三日好大潮。諸人若到浙江亭。第三柱上。題詩四句。看了記取歸來。

上堂。舉龐居士問仰山。久嚮仰山。到來為甚却覆。山豎起拂子。士云。恰是。山云。是仰是覆。士擲露柱云。雖無人見。賴有露柱證明。山擲下拂云。一任舉似諸方。

師拈云。小釋迦。若不得拂子。幾墮網羅。老居士。若不得露柱。幾落機穿。雖然二俱作家。到了且不知山是仰耶。是覆耶。

臘八上堂。雪山層層。雪澗冷冷。瞿曇過去久矣。今宵誰覩明星。遂仰頭看天云。奇哉。復云。低聲。恐成妄語誑眾生。

上堂。舉僧問九峰。如何是不壞身。峯云。正是。僧云。某甲不會。請師直指。峯云。適來曲多少。

師拈云。九峯一箇鐵彈子。若還打著者僧。不被隨手一擊百雜碎。

元宵上堂。以拂打圓相云。一輪月。以拂點云。萬點燈。月影與燈影交輝。燈光與月光互燦。遂合掌云。奇哉美哉。不可思議哉。何異過去日月燈明王如來。

雪竇長老至上堂。舉先雪竇云。春山疊亂青。春水漾虛碧。雪竇老漢。大似將公界物。作私己用。竇云。寥寥天地間。獨立望何極。果然。竇却顧侍者云。有人看方丈麼。有。竇云。作賊人心虛。不勘自敗。淨慈雖則據款結案。亦未免遭人檢點。

上堂。舉南泉問黃蘗。定慧等學。明見佛性。此理如何。蘗云。十二時中。不依倚一物始得。泉云。莫是長老見處麼。蘗云。不敢。泉云。草鞋錢且置。漿水錢教誰還。蘗休去。

師拈云。酒中下鳩。蜜裏放砒。二大老。故一時互展機關。你者一隊弄業識底。更買草鞋行脚三十年。也未夢見他氣息在。

浴佛上堂。我今灌沐諸如來。提起主丈云。今朝且浴黃面老子一箇。淨智莊嚴功德聚。燈籠眉間現瑞。露注腦後放光。五濁眾生令離垢。莫要塗汙他。同證如來淨法身。擲下主丈云。還有證得法身底麼。若證不得。淨慈又費一杓兩杓惡水。喝兩喝。下座。

上堂。舉僧問趙州。未有世界。早有此性。世界壞時。此性不壞。如何是不壞底性。州云。四大五蘊。僧云。猶屬敗壞。如何是不壞底。州云。四大五蘊。

師拈云。一箇無孔鐵鎚。兩回當面擲出。者僧若會。接得信手一揮。任是趙州眼光爍破四天下。也須倒行七步。

結夏小參。知幻即離。錯。不作方便。早是作方便。離幻即覺。錯。亦無漸次。大好無漸次。諸人還見釋迦老子一片腦門骨麼。錯。揭却了也。者三錯。如摩醯首羅。豎亞三隻眼。若從右眼入者。正在半途。從左眼入者。且居門外。從正眼入者。許你住佛屋。喫佛飯。著佛衣。肆口說佛非。淨慈一夏甘心。做箇無錢客作兒。

復舉。五祖示眾云。今日結夏。無可管顧諸人。未免作一家[飢-几+燕]。擡手云。邏羅招。邏羅搖。邏羅送。莫訝空疎。伏惟珍重。

師拈云。冷淡中設肴饌。寂寞裏動管絃。也須是鄧師伯始得。只是猶帶些子寒酸氣味在。

上堂。淨慈今夏。造箇無底船。與諸人同。遊大圓覺海。撐底自撐。拄底自拄。鼓底自鼓。搖底自搖。逗到雲淨月明。風恬浪靜。不居此岸。不住彼岸。不滯中流。悠悠颺颺。其樂可謂無涯矣。忽然平地激起洪濤。袞翻白雪。又作麼生。乃招手云。[口*裏]。穩坐著。

謝兩堂秉拂。都寺齋。上堂。一人語別別到頭。一人機橫橫到底。如今捻合來。放在面前。恰似箇鐵酸餡子。橫吞豎咬。一任諸人。有問餡子一句。切不得學五祖。念鷄冠花詩。

上堂。舉僧問趙州。學人乍入叢林。乞師指示。州云。喫粥了也未。僧云。喫粥了也。州云。洗鉢盂去。

師拈云。趙州無柄斧子。拈起劈頭一揮。隨後一斲。方圓成矣。規矩中矣。學者不知。空聞有丁丁之聲也。

上堂。南山無關。西湖無蓋。五百箇弄泥團。三成羣四拽隊。鬪耳合非東倒西播。吽吽。邏齋掇供。則不無你儂。橫擔主丈云。若要擔荷者箇法門。以手掩鼻。下座。

上堂。舉趙州問投子。大死底人。却活時如何。子云。不許夜行。投明須到。

師拈云。拔老虎鬚。截蒼龍角。豈足較二作家。當時傍若有人。不消道箇古佛古佛。

上堂。雲門道。佛法大有在。只是舌頭短。又自云。長也。吽吽。淨慈道。佛法大有在。只是口門窄。亦自云闊也。阿呵呵。然雖如是。雲門底。淨慈底。直是天地相遼。且道。以何為證。蠅頭螞脚。鶴膝蜂腰。

解夏小參。奪人不奪境。喝一喝。奪境不奪人。作什麼。人境兩俱奪。退後退後。人境俱不奪。還我話頭來。臨濟老兒。四路葛藤。殃害天下衲僧。搭面兜頭者。萬萬千千。粘手綴脚者。千千萬萬。淨慈雖是他兒孫。未嘗把口說著。當此自恣之時。不免將無口刀子。從頭割斷。縛作一束。颺在南屏山頂。儘教日炙風吹。雲埋雨洗。忽然果布萌芽孽。擾亂叢林又一番。

復舉。雲門問僧。在什麼處過夏。僧云。和尚合知。門云。我則知。僧云。且道。某甲在甚處過夏。門云。老鼠孔裏出頭。僧無語。

師拈云。猫弄鼠。猿禁猴。雲門固是有殺活機謀。檢點來。依舊出不得者僧話頭。

法語

示哲侍者

石頭和尚道。千種言。萬般解。只要教君長不昧。古人如斯言論。可謂棒打石人頭。曝曝論實事。今時叢林浩浩地。只是名字參禪學道。要覓一个半个。長時不昧底人。如空中揀月。豈不見。開山空照祖師。常喚主人翁。自應諾。惺惺著。諾。他時異日。莫受人瞞。諾諾。這箇豈不是長時不昧底雖然。是箇死蛇弄得出來。也是好笑。哲侍者在此三年。還曾解笑也未。若果未然。玄沙道底。

示昱上人歸金山

昱上人。在此相聚一夏。幸自可怜生。忽然袖紙懷香。來求法語。且不要長篇短句。呵呵。上人所求者何法。所覓者何語。豈不聞祖云乎。我宗無語句。亦無一法與人。恁地說話。早是為蛇畫足了也。今夏怛怛怛怛。何異將死雀。就地上彈。未免舉則新話。以塞其請。金山寺裹山。焦山山裹寺。千人萬人題。只是。忽地向此一句下。打失鼻孔。方知。山埜葛藤不少。更若道落了三字。却好問取金山和尚。

果上人求語過太白

即散而寂曰止。即昏而朗曰觀。此是天台智者大師玄旨也。浩浩轟轟幾百年。探其玄者多。得其旨者少。車山果上人。雖則窮玄達旨。惜乎胸次猶懷隱隱之疑。遂決志遊方。明究教外別傳之要。搗來鞞峯。必欲真登堂奧。其柰欲速而不達。一日懷香求語。過太白訪滅翁。予見其語峻氣豪。未敢與言。且引一進爛葛藤。而問之曰。何名止觀。止者是誰。觀者甚物。苟能於此。眼目定動。只明得教意。更有祖意在。豈不見。僧問巴陵。教意與祖意。是同是別。巴陵云。雞寒上樹。鴨寒下水。[口@力]。者老漢。好與三十主丈。上人但與麼舉。

日本僧以生死求語

生死事大。無常迅速。衲僧入門款子。無有不會道者。及乎問他。胡為生耶。胡為死耶。十箇五雙。口如木[木*突]。若只與麼行脚。走遍四天下。又濟甚事。

一日忽有三衲子到。口不能語。手却會書。乃知來自日本國。因有頌語。求予決死生話。未免饒舌。要知生從何來麼。但於父母未生前。密密究竟。要知死向何去麼。但於風火散後研窮。十二時中。只麼研來究去。驀然引手摸著鼻孔。便知未跨船舷。已與汝三十棒了也。其或不然。且向先徑山圓照葛藤參取。

示小師舟侍者

出家兒。要學大丈夫事業。須秉大丈夫志氣。若果如所言。何患不到祖師闔域。豈不見。歸宗因小師辭。問甚處去。討口牙也。僧云。諸方學五味禪去。不妨伶俐。歸宗曰。諸方有五味禪。我這裏。有一味禪。因甚不學。面皮厚多少。僧云。如何是和尚一味禪。望煙乞食。歸宗便打。傷鹽傷醋。僧云。會也會也。棺木裏瞪眼。歸宗曰。道來道來。老牛舐犢。僧擬開口。啞子喫蜜。歸宗又打。大好一味禪。一狀領過。

吾有不孝子若舟。志氣雖有。事業未成。一日來辭。往諸方去。乞語為警策。老僧主丈。雖在身裏。且不似歸宗胡揮亂打。待子踏破幾綱草鞋。稍知痛痒。歸來却爛與一頓。淳祐庚戌。開爐日。住瑞巖老拙書。

示儼上人

釋迦彌勒。猶是他奴。他是阿誰。十字街頭石敢當。此是尋常山僧布施學者一轉語。上人初來聞之。似疑不疑。似信不信。舉起如透金圈。放下如吞栗棘。由是無奈何。炷香請為解註。未免向白紙寫黑字。解註一遍。驀然於此憤發。管取穿三世諸佛鼻孔。換六代祖師眼睛。刮天下老和尚骨髓也。

示簡禪人

不問有言。不問無言。世尊良久。此則公案。流落叢林二千餘年。知它死了幾箇。活了幾箇。老漢室中。常舉此語。有敬簡禪人。進前拈出倚天長劍。也不易得。柄杷既已在手。何患不橫施逆用也。雖照。臨濟第四句子。切須記取。

佛祖讚

觀音

皎皎月沈波。萋萋草泣露。良哉觀世音。不會轉身句。

又泛水像

覺而動。照而寂。雲淨月明。波停水碧。圓通觸處露全身。依舊脚跟浮逼逼。

布袋和尚

朝向[廓-享+墨]中遊。暮打市裏過。滯貨賣不行。賴是肚皮大。

達磨

西竺乾。東震旦。遍流毒。是者漢。不知賺了多少衲僧。至今八錯七差。三馬九亂。

六祖夜渡

樹煙漠漠水沈沈。父子相拋用賊心。授了衣盂連夜渡。釘樁搖櫓到于今。

維摩

倚胡床。執白拂。三十二人。盡底籍沒。却將一默對文殊。兔子何曾離得窟。

靈照女

生不居家。長不出嫁。一柄箴籬。天上天下。雖然不直分文。只是無人著價。

自贊

崇德圓老請

無圓位中。一毫難狀。於第二門。有箇模[打-丁+兼]。長安城裏卓紅旗。鴈蕩峯頭翻白浪。更要不覩是籍沒一切人家財。猶要筭白帳。

雪山梵老請

握三尺鐵。震一聲雷。剛把密旨。翻作禍胎。流落西村李翁田地上。叢林又是一番災。

真如靖老請

夜叉心。菩薩面。動則雲翻大野。鬼悉懼聞。靜則練繞長溪。人皆喜見。有一道迷魂呪。三千里外學念者也靈驗。

治平壁老請

似馬無驥。似牛無角。描摸出來。非常大錯。錯錯。萬古一崖倚寥廓。

支提宏老請

搭一隻手。揮三尺鐵。天下衲僧。望風膽裂。豈料豐干院裏。撞著箇匾頭魔孽。盡把家私俱漏洩。却向玉融側童峯前。對人點脣。背地吐舌。

連雲樞老請

密運玄樞。恢張要旨。名邈得來。成甚面觜。若是金毛獅子子。誦訛豈止三千里。

慈恩涇老請

兩耳全聵。雙目半昏。涇清渭濁。誰與辨論。只麼[病-丙+斯]泐[泳-永+盾]。狼藉破沙盆。有箇不唧[口*留]底。剛要面前塗糊。背後揩抹。黑漫漫地。恰似雲屯。挂向壽峯頂上。往往喚作南山古樹根。

精嚴昂老請

軒昂氣宇。矍鑠精神。木雞驅成鸞鳳。菟狗逼作麒麟。世上知心能幾人。

寶藏主請

乾之下。坤之上。有一寶。無異相。剛地描摸出來。便見許多模[打-丁+兼]。引一切人到面前。學筭鬼丁帳。

月藏主請

頭盧突兀。面孔鱗皴。剛把一莖燈草。對人秤作半斤。阿呵呵。從教道。月明照見夜行人。

埴知客請

寒巖其骨。槁木其形。解語非舌。能言非聲。埴埴立於未立。氣質成於未成。自者般伎倆。也有人描摸上丹青。

若楫請

兒兮蘚石。形兮雲松。口捷如啞。耳聰若聾。布重網無明山上。蕩一楫煩惱海中。咩。五日後也有箇弄脫空。水底放出泥大蟲。

友方請

怒具慈悲。喜懷慘酷。指方為圓。拗曲作直。不特鑿石栽花。兼要堆雲種竹。五五合成三十六。好彩是汝不學他。學他和汝入地獄。

淨惠教老請

霜茁其巔。雲橫其肩。眼無一角。鼻少半邊。太湖水底走馬。洞庭山上撐船。天下衲僧。名不得狀不得。取不得捨不得。一齊喚作教外別傳。

觀音觀老請

眼無筋。頭無腦。是箇非箇併除。佛兮魔兮俱掃。須彌山折筯挑來。眉毛上懸挂恰好。是誰識他。觀音長老。

瑞巖眾行者請

米裏有蟲。麥裏有麵。非是老盧。何曾覩見。見不見。八角磨盤空裏轉。

壽首座請

漆桶一枚。無大得大。鼓合叢林。翻成口過。有語不勘玄機。有棒不打鐵磨。南屏今日開眼放一箇。咄咄咄。

日本雲上人請

山頭雲。天上月。雲月有殊。光影無別。此是吾端的。不許見不許聞。大唐國有人。必能辨必能別。不妨捲去挂向大溪頭。教他幾箇。橫論豎論。東說西說。

日本門上人請

須彌繞白日。碧落穿紅霞。喚作真則錯。喚作相則差。只此一門難摸索。賺他幾箇。失脚走天涯。

日本見上人請

一見便見。一得永得。有影無形。易辯難識。大唐不許藏蹤。日本那容隱迹。扶桑夜半日頭紅。不妨背手拈起一觀。決定頭斜面曲。鼻橫眼直。

偈頌

與若虛新戒付衣

靈山密付。少室親傳。或長或短。或方或圓。直下若能提得起。優曇一朵瑞祇園。

西巖

怪石嵌空濺碧流。從來無路與人游。莫嫌立處孤危甚。要與東山作對頭。

牧溪

百草頭邊意已賒。鞭繩放下臥平沙。覺來古岸東風急。橫笛一聲山日斜。

了翁

踏斷草鞋。拗折拄杖。徹底風流。匙挑不上。擬問如何。擘面便掌。

笑堂

冷地無端錯喜歡。却將鴟吻對門安。引它鐵作面皮漢。千里聞風也破顏。

無雜

平常用處黑漫漫。十二時中沒兩般。大小趙州噉飯漢。斧頭返被蛀蟲鑽。

懶散

一味放落魄。誰人柰得何。忽然刀斫手。依舊著摩挲。

月窟

曲曲彎彎地。明明白白中。當軒開闔處。一隔為誰通。

寄人

去年共遶澗濱行。話盡山雲海月情。芳樹幽禽尤記得。風前時作兩三聲。

示舜上人

古鏡未磨黑似漆。及乎磨後也模糊。忽然打作百雜碎。笑倒當年舜老夫。

斷溪

絕消息時消息。不流通處流通。未達曹源因奧。依然兩段不同。

夢菴相士

煙霞影裏蒼苔面。山水光埋古栢身。為報夢菴休諸夢。老僧不是夢中人。

小佛事

能副寺鎖龕

一即三。三即一。筭得成。能事畢。且道以何為驗。提起鎖云。明州鎖子。是三百錢買得。

連老宿鎖龕

黃連甜。甘草苦。鎖定咽喉。如何通吐。吐得出。上下四圍。鐵壁鐵壁。

炳上人骨

指骨云。者箇公案。了無條貫。本來字義炳然。剛自灰飛火亂。收拾將來。救得一半。畢竟如何。撫骨云。車不橫推。理無曲斷。

文侍者火

吹布毛。喫油糍。我未舉。汝先知。將謂有力。可能擔荷。豈料半途。收因結果。辜負一爐文武火。

珙侍者火

芝山下。清溪邊。拾得禿筆。倒蘸龍淵。著脚南屏題一篇。奈何抵死題不全。老僧為你代書去也。以火作書字勢云。看看。毫端吐光焰。眼底生雲煙。

立大師骨

撫骨一下云。立一切法。只是者箇。壞一切法。只是者箇。如何抵死看不破。看得破。絕羅籠。總持參達磨。圓機見雪峯。

信藏主起骨

無信根。無見地。說大脫空。談不了義。火聚任縱橫。刀山恣遊戲。到頭一句若為評。帶角披毛行異類。

燁菴主撒骨

擗碎黑山光燁燁。踢翻鬼窟影團團。斬新收拾歸來也。煙柳拖金鎖翠寒。

曠直歲火

放曠隨緣。逍遙任性。刈得三百个祖師。且不出老雲門陷穽。越死越生。一印印定。老嫗日中懸火鏡。

祖印源西堂火

提祖印。浚曹源。雖無一點半滴。也要沃日滔天。計窮力盡。手露脚穿。南山忍俊不禁。對眾代為著鞭。擲下火把云。會麼。死蛇驚起口生煙。

覺上人火

覺即了。不施功。鐵槌生兩竅。[跳-兆+李]跳舞西風。雖然猶在鞞峯爐爇中。

照上人起龕

寂而常照。癩馬繫枯椿。照而常寂。黑牛臥死水。撫龕云。一時裂破了也。歸去來歸去來。

新化爐。煨髮

銅頭鐵額。馬頷驢腮。倒順剷除千萬萬。零星收拾幾堆堆。作者出手。爐鞴新開。從前毛病。到此一時灰。紅个白个青个紫个赤个。以火打圓相云。盡從者箇流出來。

俱北林起靈

柏庭有子真跳竈。三尺絲桐彈得妙。一曲高山流水音。翻然轉入無生調。某人。儒林偉幹。梵苑耆英。明義皇畫於象分二儀之先。荷佛壠宗於髮引二鈞之際。埽蕩目前路布。發揚格外真機。行古道以謙恭。絕今時之進取。忽爾夢殘胡蝶。依正無差。剷然索斷麒麟。見聞俱泯。直得雷峰雷震。龍阜龍鳴。霧慘雲愁。風悲水咽。正與麼時。身裏出門則不問。門裏出身又作麼生。日午木人轟鐵笛。泥牛[跳-兆+亨]跳過南山。

南陽郡夫人及小承奉起棺

芙蓉夢破篆煙殘。仙袂飄飄下廣寒。暫向塵寰賦離別。哀笳聲咽曉風酸。(以手指左邊云)者裏見得。便知南陽郡夫人綦氏。佩德門明訓。相命世鉅賢。鸞韓鳳席。不足以樂其生。象服魚軒。不足以榮其死。(指右邊云)那裏見得。便知直閣小承奉。孕秋水精神。具食牛骨氣。罷翫二十四橋風月。歸看萬八千丈煙雲。者裏那裏一時捏聚。遂為母子如初。古之今之兩段雖殊。畢竟絲毫不隔。裂破榮華關鎖。掀翻富貴網羅。機回位轉。虎躍松門。水揖山迎。龍眠石塢。正與麼時。且道。路頭在什麼處。(以手直指云)驀直去。絕周遮。脚頭觸處是生涯。四方八面。滿空紛錯散天花。

斷橋和尚語錄卷下(終)

No. 1394-B行狀

師諱妙倫。號斷橋。台州黃巖松山人也。又號松山子。姓徐。母劉氏夢。空中月明。已而有娠。嘉泰辛酉。八月十七日乃生。眉目秀異。性姿冲朴。絕不樂世間學。年十八。依永嘉廣慈院宗嗣論師出家。乃俗季父也。即刈髮投禮。未暮行脚。首見谷源道於瑞巖。聞室中舉麻三斤。乾屎橛話。頓起礙膺之疑。明年挈包謁靈隱。一夕夷石鼓。為巖運菴對靈小參。歷舉運菴平日見處。師聞之愈疑。旋次華藏。適淨淳菴臥疾。冒雪過長蘆。忽自念曰。參禪若不徹去。孰若把本修行。遂發心背蓮經至三卷。有僧問曰。何不參禪去。師曰。手拙耳聾。字又不識。佛祖要道。豈淺根小智可得哉。僧曰。六祖是擔柴漢。乃得黃梅衣鉢。汝若參得一句透。勝背萬卷蓮經。師由是輟經。單提庭前柏樹子話。廢寢忘食。如坐刺棘中。久之巡禮祖山。值歲歉。或併日不得食。師裕如也。

因至雲居留夏。孜孜忘倦。脇不印席。中心憤悱。或喜或瞋。一日往見山堂。閱楞伽經。至或戲笑或怒罵。蚊虻螻蟻。無有言說。而能辦事處。豁然有省。頓見處趙

州直截為人處。平昔凝滯冰釋。自是機鋒敏捷。時同堂友。虛堂愚石帆衍。號稱俊絕。平居每舉古今。以相凌駕。

還遊四明。方佛鑑道鳴乳竇。執侍左右。朝夕決擇。佛鑑多听听而笑。一日佛鑑。因舉狗子無佛性話。至末後為伊有業識在。一句。徵詰。下語幾三十轉。皆不契。師再進曰。豈無方便耶。佛鑑乃舉真淨頌曰。海枯終見底。人死不知心。良久聞板聲。赴堂。下階三級。驀然警地。乃徹見佛鑑鉗鎚妙密。倒心事之。

佛鑑遷育王。師侍行。雖泯泯眾底。不為表襮。識者莫不器焉。佛鑑題頂相。付之曰。弄假像真。弄真像假。裂破面門。非驢非馬。世上有誰親見來。天台石橋倫侍者。

辭去西遊。時久約翁。唱無用道於吳之薦巖。俾師侍香。翁入室。舉三喚三應話。師曰。無風起浪。翁曰。將為吾辜負汝。却是汝辜負吾。師曰。天堂未就。地獄先成。翁刮目知待。商確古今。日增智證。

逮華藏見妙峰善。峰於衲子少許可。獨加賞識。命典客。

佛鑑奉詔登徑山。因再參焉。命掌法藏。既復自惟曰。寔安鳩毒。苟勞身利眾。吾何為不勉。持淨一年拂垢滌穢。皆躬為之。佛鑑亟稱於眾。遂延為第二座。提唱警拔。萬口膾炙。時徑山號為多士。師表儀其間。咸悅服之。嘉熙己亥。東歸寓巾峰。問道舊藏密趙公曰。似地擎山。不知山之孤峻。如石銜玉。不知玉之無瑕。公曰。自己。師云。自己響。公於言下有省。而白雲道學。一時川驚矣。

庚子秋。諸山舉鄉之祇園出世。瓣香為佛鑑嗣。老屋數十楹。羹藜飯麥。處之自若。雖僻絕荒寒。衲子無所容。而過門扣請者。無虛日。一日向火次。有僧正因來參。師問。曾見甚麼人。因曰。曾見短蓬和尚來。師曰。短蓬室中舉甚話。因曰。如何是塵塵三昧。鉢裏飯桶裏水。師曰。作麼生會。因曰。不會。特來見和尚。師擲火柴頭示之。因禮拜曰。恩大難酬。袖紙乞語。師作偈曰。相逢驀筭問來端。拋下柴頭君自看。火種星兒如搆得。諸方却被老兄瞞。因辭。歸車嶺所自築菴。報道人曰。今夜有猛虎來。汝各自回避。隨以火焚其菴。徑歸鴻福延壽堂坐脫。後有自中都回者。過酌水嶺遇因。問曰。菴主何處去。因曰。我過天台去。客歸乃知己遷化矣。或以告師。師曰。我當時悔不痛與一頓。其接人得力如此。

三年遷瑞巖。師慨然曰。空照故家。久矣不作。飭躬力行。吾其敢怠乎。日勤槌拂。法席滋盛。揚聲叢林者。自以為饜滿。至則欲然若不足。

時有特賜繼一處士郭公。號天台耆舊。雅意禪學。慕師重名。趨而就弟子列。日求授道之旨。閱時既久。執禮益勤。是不有大過人。曷以若此。

而佛鑑尚無恙。喜其類己。嘗師畫像題其上。轉喉觸諱。開口成禍。黃檗樹頭。討甚蜜菓。咄咄咄咄。累我累我。其師資膺合如此。

說法餘暇。尤留情土木。堂宇圯陋。皆撤而新之。居九年。今大丞相秋壑賈公。鎮淮閩。稔聞師名。以功德國清招致。師固辭。疏筭敦迫。乃行。學徒竭蹶趨風。惟恐後。戶外之履常滿。人物。視諸方為最盛。乃捐囊[囊-呆+木]。建眾寮。扁曰琪林。以延來者。又捺海塗數千頃。合港之際。人皆為難。師冒風濤默禱。取法衣鎮之。遂截為膏腴。建閣立庫。成不磨之基。

寶祐丙辰九月。被旨。遷淨慈。既至。執事者。遽以廩匱告。師曰。衲子為法來耳。諸方豈無飯耶。乃持鉢行化。時觀相節齋趙公。使吳。發廩為倡。大家巨室。聞風委施。丞相尚留維揚。給助逾厚。穉載來歸。無情容得色。寺田旱澇。頻歲儉收。師數倡衣盂貸糶。供億不足。寺之耆宿。以皇太后舊有中元普度會事。告師。師遂聞于晉菴中使楊公。奏復故典。及設會之夕。細雨陰雲。空中影像。雜沓鱗萃。見者凜然。上聞之。賜內膳米數伯碩。自是錫賚日優。斯會乘為永式。

景定庚申。大丞相履齋吳公。召師翌日見。而夜夢。老僧奮臂。對其說法。公退朝。及見師。謂其只知涅槃臺上工夫。公喜甚。館留竟日。師直然忘形。斂袖議論。與夢中老僧肖焉。自後扣請益勤。致禮益重。

惟師任大法之寄。方將闢公道。塞倖門。以惠遠學。志未及施。而鬲間之疾作矣。師雖臥疾。而接納略無倦容。遇有扣請者。必盡底蘊而後已。臨終。日本三僧。繪師頂相。請讚。師筆力猶勁。復為眾入室。舉四大分離話。徵詰。圓活機不可測。繼染書。遺今大丞相。與藏密大監趙公。丞相亟遣人問曰。師生天台。因甚死於淨慈。師笑曰。日出東方夜落西。復寫四句云。來也握雙拳。去也伸兩掌。透得者一關。藕絲牽玉象。乃趺坐而逝。享年六十一。臘四十四。景定二年。四月二十五日也。學者請于都省。奉全身。塔於寺之西偏。小師若斯若虛。募中殿宰府。賜錢成之。

日本國參學僧正見。航金拾兩來。命工刊師語錄流行。

師為人。樂易慈順。顧雖少文。而於佛祖關鑰。探微闡秘。視從上宿師。誠不多讓。每一語之出。必四海樂聞。故志道之士。從之猶水就下。此可以力致哉。既寂。莫不痛心疾首。蓋其繫大法之輕重云。

No. 1394-C附筆

山菴雜錄云。斷橋和尚。為人峻硬。於衲子謹許可。住國清日。泳象潭為首座。屋古田為書記。藏主失其名氏。結夏秉拂陞堂敘謝。乃云。首座見前輩來。不在稱譽。書記提唱語。如畫人物。種種俱備。但欠點眼爾。藏主提唱語。却不知說箇什麼。他時後日。也道在老僧會中辦事來。

是其以主法為己任。不肯少損威光。迷謬後學。雖曰抑之。實欲扶之也。今之主法者。自家眼既不明。務以甜糖蜜水。取悅於人。冀其相感。作我法嗣。嗚呼使斷橋

。見此浮靡。豈惟唾罵而已哉。

No. 1394-D斷橋和尚語錄重梓序

咄。空劫以前。還有者個消息也無。無端向太清虛中。說黃道白蚤。是不啣[口*留]。奚堪矢上加尖。而更形諸楮墨乎。雖然。嘗聞之諺曰。祖禰不了。殃及兒孫。昔我釋迦老子。為一大事因緣故。出現於世。以度生為急務。其於迷流。弗克直下會取。不得已乃分時列教。如撒縵天網子。攬人天魚。凡有血氣者。莫不一一收盡。末後拈花示眾。獨飲光破顏微笑。世尊曰。吾有正法眼藏。涅槃妙心。實相無相。微妙法門。付囑摩訶迦葉。展轉相傳。至二十八祖菩提達磨。航海東來。直指人心。見性是佛。得可大師。斷臂安心。受囑行化。四傳而至曹溪大鑑。鑑出南嶽青原。原五傳而有曹洞宗。南嶽亦五傳。而有臨濟宗。宗風獨臨濟為盛。道播天下。名喧中外。越七世而有楊岐會。會九傳而得無準範。我倫祖斷橋和尚。乃無準入室真子也。俗姓徐。台州之黃巖人。母夢月而孕。年十八出塵。歷參耆宿。有悟入。晚謁無準於雪竇。準問。甚處來。師曰。天台。準曰。曾過石梁橋麼。師曰。一脚踏斷了也。準深器之。遂以斷橋二字。號師焉。準室中嘗以狗子因何有業識在。令師下語。凡三十轉。不契。師曰。可無方便。準舉真淨頌言。有業識在。誰云意不深。海枯終見底。人死不知心。師竦然良久。忽聞板聲。通身汗下。於是脫然。準出從上源流灑衣。并付偈曰。真理直如絃。何言更何默。我今善付囑。表心本無得。師領旨。出世開法台州之祇園。瑞巖。國清。杭州之淨慈。讀師之四會語錄。其提唱真乘。舉揚大法。使人復見曹溪水長滄沱浪闊。其扶樹正宗之功。豈曰小補哉。一時仕大夫。無不敬仰。越太師魏公。嚮師高風。加以師禮。師臨終集眾。入室作書。辭諸山及魏公。公饋藥。不受。公問曰。和尚生在天台。因何死於淨慈。師曰。日出東方夜落西。書偈而寂。余曾閱金湯編。有希逸林公。撰師塔銘。略曰。余謂。富鄭公於顯華巖。范文正於古薦福。張紫巖於杲大慧。皆以元勳大老。敬向其人。故叢林至今。以為法棟。今師之得魏公者。又何遜哉。非公無以知師。非師無以得公也。其大機大用。具在語錄。乃為銘曰。斷橋之學。不以言句。傳所可傳。竹谿已序。師於叢林。末法砥柱。我觀其初。信有異趣。麻矢何疑。楞伽何悟。無準室中。不契何故。所聞何聲。始得汗出。師今何故。板鳴不住。是聲何如。必有落處。我為此銘。來者轉註。林公言。竹溪已序。尚未之見。然林公所撰。雖曰塔銘。亦可為師序也。據此則師之語錄。非止此也。余昔謁覺浪盛公。三宜孟公。石雨方公。乃扣及本分事。三公皆曰。茲金明介菴和尚。斷橋直下兒孫。真古佛出世。何用別參。余竟造金明。體究甚契。一日喟然謂余曰。我祖斷橋。必有成錄。行世十餘載。覓之不獲。囑余與同列僧徒徧覓。亦不獲。迨康熙甲子歲。晦岳旭公。抵閩旋浙。禮華祖塔于天童。會山曉哲公。盤桓信宿方丈。得師是錄。抄之攜歸。示諸法屬。競集金明。驚喜。焚香禮誦。如獲拱璧。噫我祖語

錄。自宋淳祐迄今。約五百六十餘年。中間淪沒。不知歷幾年所。而況為忌者之所搜燼。其不泯滅者。必龍神威力之所呵護耶。遂各謄一帙。珍之。惜其未獲全軸。祕之篋中。欲俟得完璧。而後刊行。越八載。辛未。適同門妙雲法兄。從山東之大悲來。謂。雖殘編斷簡。足見一斑。乃捐衣鉢之賞。即付棗梨。非圖競彩。務與海內有眼者。共覩見師真樸之風。截去時習之弊。悲願沁人。廓無同異。直使將信將疑之流。斷却命根。分門列戶之輩。剷除人我。真可謂抉翳金鑱。又何用夫門庭施設哉。宜乎。妙兄之不能已于斯刻也。後屬余序。余固不文。不敢辭。爰述師之梗槩。并林公塔銘。俾後之來者。得悉師之本末。及師之道德作用。若師之語錄。謂余可序者。實猶潑墨之染太虛空也。

肯。

康熙壬申長夏嗣祖十六世法孫真本瓶山項謙薰 沐和南 題。